

ओं नमः परमात्मने, श्री महागणपतये नमः

श्री गुरुभ्यो नमः

हरिः ओं

कृष्ण यजुर्वेदीय तैत्तिरीय

अभिश्चवणमन्त्र पाठः

Version Notes:

This is now the current Version 3.2 dated Sep 30, 2022.

1. This replaces the earlier version 3.1 dated May 31, 2021.
2. This version has been updated with the errors found and reported till Sep 30, 2022.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id vedavms@gmail.com

Earlier Versions

1st Version Number	1.0 dated 10th March 2017
2nd Version Number	2.0 dated 10th Jan 2018
3rd Version Number	3.0 dated 18 th April 2018
4th Version Number	3.1 dated 31st May 2021

SHORT NOTE ON “ABHISRAVANAM”

Abhisravanam means dignified hearing. Abhisravana Mantra should be chanted during ceremony to forefathers like Sraadham etc. This should be chanted loudly while the Brahmins are partaking food so that these mantras are to be heard by Brahmins, who represent “Pitrus” of Sraadham ceremony. Since these Mantras are about “Pitrus”, when chanted they are pleased and depart contented after Sraadham ceremony. These Mantras will also keep the “Raakshasaas”(evil forces)/ other hindrances at bay.

Brahmins will be invited to perform Abhisravanam. They should be offered dakshina after the Sraadham for chanting Abhisravanam.

For Ekodishtam (the eleventh day of death ceremony), Sapindeekaranam (the 12th day ceremony), Maasikam, Anumaasikam, Naandi, Gaya Sraadham, 1st Sraadham of the deceased (1st Death Anniversary) etc., Abhisravanam Mantra shall not be chanted.

The Abishravana Mantras are the part of “Taittiriya Shaka” and the Mantras are from “SAMHITA” and “BRAHMANA”

General Notes:

This Book has been brought to you with the courtesy of some Veda learners who have collaborated to prepare this book.

Please give your feedback, comments and report errors to the e-mail id vedavms@gmail.com. We shall strive to make this book more accurate and error-free.

You may note that there are inherent “paata bedhas” when we compare various sources and books, the Taittiriya Sakhaa compiled and commented by Shri. Sayanacharya of 13th Century and Shri Bhatta Bhaskaracharya (period unknown). Their manuscript compilations were later converted into books by great Scholars. One of such sets of “Taittiriya” was printed and published during earlier 1900 A.D. at Govt. Branch Press, Mysore and another set later published under “Anandaashram Series”. These Books were referred to by us as our primary source material for this Book.

We have also referred “Yaajusha Ratnaakaram” in Sanskrit and “Abisravana Mantra Pataha” in grantha Script published in 1923 by Shri T.M. Narayana Shastri .

This book has not been prepared with any commercial purpose and is purely for studies.

Conventions used in Letters:

ॐ is represented by (gg)
—

ॐ is represented by (gm)
—

ॐ is represented as anunaasikam
—

”[]” is represented as the end of a “panchaati”, not a full-stop nor a sentence break. Hence donot stop the chant on the mark of “[]” and continue till a sentence break (full stop) comes.

Table of Contents

1 पुरुष सूक्तं	8
2 उत्तर नारायणं	11
3 महा नारायणं	12
4 ऋतं सत्यं	14
5 रक्षोघ्नं	16
6 रक्षोहणो वलगहनः	20
7 सोमाय पितृमते	20
8 उशन्तस्त्वा हवामह उशन्तः	22
9 भक्षेहि माऽऽविश	25
10 ध्रुवाऽसि धरुणाऽस्तृता	25
11 अग्न उदधे या त इषुः	33
12 शिरो वा एतद् यज्ञस्य	35
13 असावादित्यो ऽस्मिन् लोक	35
14 संततिर्वा एते ग्रहाः	37
15 एकविंश एष भवति	41
16 इन्द्रो वृत्रं हत्वा	41
17 वैश्वदेवेन वै प्रजापतिः	43

18अग्नये देवेभ्यः.....	47
19उशन्तस्त्वा हवामह	55
20अयं वाव यः.....	57
21उशन् ह वै	59
22तꣳ हैतमेके.....	63
23यां प्रथमामिष्टका.....	67
24ऋचां प्राची.....	69

=====

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

अभिश्चवणमन्त्र पाठः

वेदादयः

ओं । अ॒ग्निमी॑ळे पु॒रोहि॑तं-य॒ज्ञस्य॑ दे॒वमृ॑त्विजं ।

होता॑रं रत्न॑ धा॒तमं॑ ।

इ॒षेत्वो॑र्जे॒त्वा वा॒यव॑स्स्थो पा॒यव॑स्स्थ दे॒वो व॑स्सवि॒ता प्रा॑र्पयतु
श्रेष्ठ॑तमाय॒ कर्म॑णे ।

अ॒ग्न आ॒याहि॑ वी॒तये॑ गृ॒णानो॑ ह॒व्यदा॑तये ।
नि॒होता॑ स॒त्विर्ब॑र्हिषि ।

श॒न्नो दे॒वीर॒भिष्ट॑य॒ आपो॑ भवन्तु पी॒तये॑ ।

ँशं॑यो॒रभि॑ स्रवन्तुनः ॥ १

1 पुरुष सूक्तं

T.A. 3.12.1

स॒हस्र॑शीर्षा॒ पुरु॑षः । स॒हस्रा॑क्षः स॒हस्र॑पात् ।
स भूमिं॑ वि॒श्वतो॑ वृ॒त्वा । अत्य॑तिष्ठ-द॒शाङ्गु॑लं ।
पुरु॑ष ए॒वेद॑ꣳ स॒र्वं॑ । यद् भू॒तं यच्च॑ भ॒व्यं॑ ।
उ॒तामृ॑त॒त्व-स्ये॑शानः । यद॒न्नेना॑ति-रोह॑ति ।
ए॒तावा॑नस्य म॒हिमा॑ । अतो॒ ज्याया॑ꣳश्च पू॒रुषः॑ ॥ 1

T.A. 3.12.2

पादो॑ऽस्य वि॒श्वा भू॒तानि॑ । त्रि॒पाद॑स्या-मृ॒तन्दि॑वि ।
त्रि॒पादूर्ध्व॑ उ॒दैत् पुरु॑षः । पादो॑ऽस्येहा ऽऽभ॒वात्पुनः॑ ।
ततो॒ विष्व॑ङ् व्य॒क्राम॑त् । सा॒शना॑न॒शने॑ अ॒भि ।
तस्मा॑द् वि॒राड् जा॑यत । वि॒राजो॒ अधि॑ पू॒रुषः॑ ।
स जा॒तो अत्य॑रिच्यत । प॒श्चाद् भूमि॑मथो पु॒रः ॥ 2

T.A. 3.12.3

यत् पुरु॑षेण ह॒विषा॑ । दे॒वा य॒ज्ञमत॑न्वत ।
व॒सन्तो॑ अ॒स्या-सी॒दाज्यं॑ । ग्री॒ष्म इ॒द्ध्म-श्शर॑द्ध॒विः ।

स॒प्तास्या॒सन् परि॒धयः॑ । त्रि॒स्सप्त॑ स॒मिधः॑ कृ॒ताः ।
दे॒वा यद् य॒ज्ञं-त॒न्वा॒नाः । अब॑द्धन् पु॒रुषं॑ प॒शुं ।
तं य॒ज्ञं ब॒र्हिषि॑ प्रौक्षन् । पु॒रुषं॑ जा॒तम॒ग्रतः॑ ॥ 3

T.A. 3.12.4

तेन॑ दे॒वा अ॒यज॑न्त । सा॒द्ध्य॒ा ऋ॒षयश्च॑ ये ।
तस्मा॑द्य॒ज्ञाथ् सर्व॑हु॒तः । संभृ॑तं पृष॒दाज्यं॑ ।
प॒शूँस्ताँश्च॑ क्रे वा॒यव्यान्॑ । आ॒रण्यान्॑ ग्रा॒म्याश्च॑ ये ।
तस्मा॑द्य॒ज्ञाथ् सर्व॑हु॒तः । ऋ॒चः सा॒मानि॑ ज॒ज्ञिरे॑ ।
छन्दाँ॑सि ज॒ज्ञिरे॑ तस्मा॑त् । य॒जुस्तस्मा॑ द॒जाय॑त ॥ 4

T.A. 3.12.5

तस्मा॑दश्वा॒ अजा॑यन्त । ये के॑ चो॒भया॑द॒तः ।
गा॒वो ह ज॒ज्ञिरे॑ तस्मा॑त् । तस्मा॑ज्जा॒ता अ॒जाव॑यः ।
यत्पु॑रुषं व्य॒दधुः॑ । क॒ति॒धा व्य॑कल्पयन् ।
मु॒खं कि॑म॒स्य कौ॒ बा॒हू । का॒वूरू॑ पा॒दावु॑च्येते ।
ब्रा॒ह्म॒णो॒स्य मु॑खमासीत् । बा॒हू रा॒जन्यः॑ कृ॒तः ॥ 5

T.A. 3.12.6

ऊ॒रू तद॑स्य॒ यद्वै॑श्यः । प॒द्भ्या॑ञ् शू॒द्रो अ॑जायतः ।
 च॒न्द्र॒मा॒ मन॑सो जा॒तः । चक्षो॑-स्सू॒र्यो अ॑जायत ।
 मु॒खादिन्द्र॑-श्चा॒ग्निश्च॑ । प्रा॒णाद् वा॒यु-र॑जायत ।
 ना॒भ्या आ॑सीदन्त॒रिक्षं॑ । शी॒र्ष्णो द्यौः॑ सम॒वर्त॑त ।
 प॒द्भ्यां भूमि॑ दि॒शः श्रो॑त्रात् । तथा॑ लो॒काञ् अ॑कल्पयन् ॥ 6

T.A. 3.12.7

वे॒दा॒हमे॑तं पु॒रुषं॑ म॒हान्तं॑ । आ॒दि॒त्यव॑र्णं तम॒सस्तु॑ पा॒रे ।
 सर्वा॑णि रू॒पाणि॑ वि॒चित्य॑ धी॒रः । ना॒मानि॑ कृ॒त्वाभि॑वदन् यदास्ते॑ ।
 धा॒ता पु॒रस्ता॑द्यमु॒दा ज॒हार॑ । श॒क्रः प्र॑वि॒द्वान् प्र॒दिश॑श्चत॒स्रः ।
 तमे॒वं वि॒द्वान॑मृत॒ इह॑ भवति । नान्यः पन्था॑ अ॒यना॑य विद्यते ।
 य॒ज्ञेन॑ य॒ज्ञ-म॑यजन्त दे॒वाः । तानि॑ धर्मा॑णि प्रथ॒मान्या॑सन् () ।
 ते ह॒ नाकं॑ म॒हिमा॑नस्सचन्ते । यत्र॑ पूर्वे॑ सा॒द्ध्या-स्सन्ति॑ दे॒वाः ॥ 7
 (पू॒रुषः - पु॒रौ - ऽग्र॑तो - ऽजा॑यत - कृ॒तो - ऽक॑ल्पय -
 त्रा॒सन् द्वे च॑)

2 उत्तर नारायणं

T.A. 3.13.1

अ॒द्भ्यस्सं॑भू॒तः पृ॒थि॒व्यै र॒साच्च॑ । वि॒श्वक॑र्म॒णः स॒मव॑र्त्तताधि॑ ।
तस्य॑ त्व॒ष्टा वि॒दध॑द्रूपमेति॑ । तत्पु॑रुषस्य॒ विश्व॑ मा॒जान॑मग्रे॑ ॥
वेदा॑हमे॒तं पु॑रुषं॒ महान्तं॑ ॥ आ॒दि॒त्य वर्णं॑ तम॒सः पर॑स्तात् ।
तमे॒वं वि॒द्वान॒मृत॑ इ॒ह भ॑वति । नान्यः॑ पन्था॒ विद्य॑तेऽय॒नाय॑ ॥
प्र॒जाप॑तिश्चरति॒ गर्भे॑ अ॒न्तः । अ॒जाय॑मानो बहु॒धा विजा॑यते । 8

T.A. 3.13.2

तस्य॑ धी॒राः परि॑जानन्ति॒ योनिं॑ ॥ मरी॑चीनां प॒दमि॑च्छन्ति वे॒धसः॑ ॥
यो दे॒वेभ्य॑ आ॒तप॑ति । यो दे॒वानां॑ पु॒रोहि॑तः ।
पूर्वो॑ यो दे॒वेभ्यो॑ जा॒तः । नमो॑ रु॒चाय॑ ब्रा॒ह्मये॑ ॥
रुचं॑ ब्रा॒ह्मज्ज॑नयन्तः । दे॒वा अग्रे॑ तदब्रुवन् ।
यस्त्वै॒वं ब्रा॒ह्म॒णो वि॒द्यात् । तस्य॑ दे॒वा अस॑न्वशे॑ () ॥
ही॒श्च ते ल॒क्ष्मीश्च॑ पत्न्यौ॑ ॥ अ॒हो॒रा॒त्रे पा॒र्श्वे ।

नक्षत्राणि रूपं । अश्विनौ व्यातं ।

इष्टं मनिषाण । अमुं मनिषाण । सर्वं मनिषाण ॥ 9

(जायते – वश सप्त च)

3 महा नारायणं

TA 6.11.1

सहस्रशीर्षं देवं विश्वाक्षं विश्वशं भुवं ।

विश्वं नारायणं देवमक्षरं परमं पदं ॥

विश्वतः परमान्नित्यं विश्वं नारायणं हरिं ।

विश्वमेवेदं पुरुष स्तद्विश्व-मुपजीवति ॥

पतिं विश्वस्यात्मेश्वरं शाश्वतं शिवमच्युतं ।

नारायणं महाज्ञेयं विश्वात्मानं परायणं ॥

नारायण परो ज्योतिरात्मा नारायणः परः ॥

नारायण परं ब्रह्म तत्त्वं नारायणः परः ।

नारायण परो ध्याता ध्यानं नारायणः परः ।

यच्च किञ्चिज्-जगत्सर्वं दृश्यते श्रूयतेऽपि वा ।

अन्तर् बहिश्च तथ् सर्वं व्याप्य नारायणः स्थितः ॥ 10

TA 6.11.2

अनन्त मव्ययं कविः समुद्रेऽन्तं विश्वशंभुवं ।

पद्मकोश-प्रतीकाशः हृदयं चाप्यधोमुखं ॥

अधो निष्क्या वितस्त्यान्ते नाभ्यामुपरि तिष्ठति ।

ज्वालमालाकुलं भाती विश्वस्यायतनं महत् ॥

सन्ततः शिलाभिस्तु लंबत्या कोशसन्निभं ।

तस्यान्ते सुषिरः सूक्ष्मं तस्मिन् सर्वं प्रतिष्ठितं ॥

तस्य मध्ये महानग्निर् विश्वार्चिर् विश्वतो मुखः ।

सोऽग्रभुग् विभजन् तिष्ठन्नाहार-मजरः कविः ॥

तिर्यगूर्ध्व मधश्शायी रश्मयस्तस्य सन्तता ।

सन्तापयति स्वं देहमापादतल मस्तगः ।

तस्य मध्ये वह्नि शिखा अणीयौर्ध्वा व्यवस्थितः () ॥

नी॒लतो॑ यद॒ मध्य॑स्थाद् वि॒द्युल्ले॑खेव॒ भास्व॑रा ।
नी॒वार॑ शू॒कव॑त्तन्वी पी॒ता भा॑स्वत्य॒णूप॑मा ॥
तस्याः॑ शि॒खाया॑ म॒ध्ये पर॑मा॒त्मा व्य॑वस्थि॒तः ।
स ब्र॑ह्म स शि॒वः स हरिः॑ सेन्द्रः॒ सोऽक्ष॑रः पर॒मः स्व॒राट् ॥ 11
(ना॒राय॑णः स्थि॒तो – व्य॑वस्थि॒तश्च॑त्वारि॒ च)

4 ऋ॒तꣳ स॒त्यं

T.A.6.12.1

ऋ॒तꣳ स॒त्यं परं॑ ब्र॒ह्म पु॒रुषं॑ कृ॒ष्ण पि॒ङ्गलं॑ ।
ऊ॒र्ध्वरे॑तं वि॒रूपा॑क्षं वि॒श्वरू॑पाय॒ वै नमो॑ नमः॑ ॥ 12a

T.A.6.1.6

ना॒राय॑णा॒य वि॒द्महे॑ वा॒सुदे॑वाय॒ धीम॑हि ।
तन्नो॑ वि॒ष्णुः प्र॑चो॒दयात् ॥ 12b

T.S.1.2.23

वि॒ष्णो॒र्नु॒कं॑ वी॒र्या॑णि प्र॒वो॒चं॑ यः पा॒र्त्थि॑वा॒नि वि॒ममे॑ र॒जा॒सि॑
यो अ॒स्क॒भा॒य-दु॒त्तर॑ स॒धस्थं॑ वि॒चक्र॑माण-स्त्रे॒धोरु॑गा॒यो
वि॒ष्णो-र॒राट॑म॒सि वि॒ष्णोः॑ पृ॒ष्ठम॑सि वि॒ष्णो-इ॒ज॒प्त्रे॑स्थो वि॒ष्णो
-स्स्यूर॑सि वि॒ष्णोर् ध्रु॒वम॑सि वै॒ष्णव॑म॒सि वि॒ष्णा॑वे त्वा ॥ 12c

=====

5 रक्षोघ्नं

कृ॒णु॒ष्व पा॒जः प्र॒सि॒तिं न पृ॒थ्वीं ँ॒या॒हि रा॒जे वा॒मवा॒ꣳ इ॒भै न ।
तृ॒ष्वीम॒नु प्र॒सि॒तिं-दू॒णानो ऽस्ता ऽसि वि॒द्ध्य र॒क्षस॒ स्तपि॑ष्ठैः ॥
तव॑ भ्र॒मास॑ आ॒शुया॑ प॒तंत्य॑नु स्पृ॒श धृ॒षता॑ शो॒शुचा॑नः ।
तपू॑ꣳष्य॒ग्ने जु॒ह्वा प॒त॒ङ्गान॑स॒न्दितो॑ वि सृ॒ज वि॒ष्व गु॒ल्काः ॥
प्र॒तिस्प॑शो वि॒सृज॑-तू॒र्णित॑मो भ॒वा पा॒युर्वि॑शो अ॒स्या अ॒द॒ब्धः ।
यो नो॑ दू॒रे अ॒घश॑ꣳसो - [] 13

TS 1.2.14.2

यो अ॒न्त्य॒ग्ने मा॒कि॒ष्टे व्य॑थि॒रा द॑ध॒र्षी॑त् ॥
उ॒द॒ग्ने ति॑ष्ठ प्र॒त्याऽऽ त॑नु॒ष्व न्य॑मि॒त्राꣳ ओ॑ष॒तात् ति॑ग्महे॒ते ।
यो नो॑ अ॒राति॑ꣳ स॒मि॒धान॑ च॒क्रे नी॒चा तं ध॑क्ष्य॒तसं॑ न शु॒ष्कं ॥
ऊ॒र्ध्वो भ॑व प्र॒ति वि॒द्ध्या॑द्ध्य॒स्मदा॑ वि॒ष्कृ॑णु॒ष्व दै॒व्या॑न्य॒ग्ने ।
अ॒व स्थि॑रा त॒नुहि॑ या॒तु जू॑नां जा॒मिम॑जा॒मिं प्र मृ॑णीहि श॒त्रून् ॥
स ते॑ - [] 14

TS 1.2.14.3

जानाति सु॒मतिं॑ य॒वि॒ष्ठय॑ ई॒वते॑ ब्र॒ह्म॒णे गा॒तुमै॑रत् ।
वि॒श्वा॒न्यस्मै॑ सु॒दिना॑नि रा॒यो द्यु॒म्ना॒न्यर्यो॑ वि दुरो॑ अ॒भि द्यौ॑त् ॥
से॒द॒ग्ने अस्तु॑ सु॒भगः॑ सु॒दानु॑र्यस्त्वा नित्ये॑न ह॒विषा॑य उ॒क्थैः॑ ।
पि॒प्री॑षति स्व आयु॑षि दुरो॒णे वि॒श्वेद॑स्मै सु॒दिना॑ सा ऽस॑दिष्टिः ॥
अ॒र्चामि॑ ते सु॒मतिं॑ घोष्य॒र्वाख् सं ते॑ वा॒वाता॑ जरता – [] 15

TS 1.2.14.4

मि॒यंगीः॑ ।
स्व॒श्वा॒स्त्वा सु॒रथा॑ म॒र्जये॑-मा॒स्मे क्ष॒त्राणि॑ धा॒रये॑रनु द्यून् ॥
इ॒ह त्वा॒ भूर्या॑ च॒रेदु॑प॒ त्मन् दो॑षावस्त दी॒दिवा॑ ऽस-म॒नु द्यून्॑ ।
क्री॒ड॒न्तस्त्वा सु॒मन॑सः स॒पेमा॑भि द्यु॒म्ना त॑स्थि॒वा ऽ सो॒ जना॑नां ॥
य॒स्त्वा स्व॑श्चः सु॒हि॒रण्यो॑ अ॒ग्न उप॑याति व॒सुम॑ता रथे॒न ।
तस्य॑ त्रा॒ता भ॑वसि॒ तस्य॑ स॒खा यस्त॑ आ॒तिथ्य॑ मा॒नुष॑ग् जुजोषत् ॥
म॒हो रु॑जामि – [] 16

TS 1.2.14.5

बन्धु॑ता वचो॑भिस्तन्मा॑ पि॒तुर्गो॑तमाद॒-न्विया॑य ।
 त्वं नो॑ अस्य॑ वच॑स-श्चि॒किद्धि॑ हो॒तर्य॑विष्ठ सु॒क्रतो॑ दमू॒नाः ॥
 अस्व॑प्नजस्तरण॑यः सु॒शेवा॑ अतन्द्रा॒ सो ऽवृ॑का अश्रमि॑ष्ठाः ।
 ते पा॒यवः॑ स॒दिध्र॑यञ्चो निष॒द्या ऽग्ने॑ तव॒ नः पा॑न्त्वमूर ॥
 ये पा॒यवो॑ मामते॒यन्ते॑ अग्ने॒ पश्य॑न्तो अ॒न्धं दु॑रिताद॒ रक्ष॑न् ।
 र॒रक्ष॑तान्त् सु॒क्रतो॑ वि॒श्ववे॑दा दि॒प्सन्त॑ इद्-रि॒पवो॑ ना ह - [] 17

TS 1.2.14.6

दे॒भुः ॥
 त्वया॑ व॒यञ् स॑ध॒न्य-स्त्वो॑ता-स्तव॒ प्रणी॑त्य श्याम॒ वाजा॑न् ।
 उ॒भा श॑ञ्सा सू॒दय॑ सत्यता॒ते ऽनु॑ष्ठु॒या कृ॑णुह्यह्याण ॥
 अ॒या ते॑ अग्ने॒ समि॑धा वि॒धेम॒ प्रति॑ स्तोमञ् श॒स्यमा॑नं गृ॒भाय॑ ।
 दहा॑शसो॒ रक्ष॑सः पा॒ह्यस्मा॑न् द्रु॒हो नि॒दो मि॑त्रमहो अव॒द्यात् ॥
 र॒क्षो॒हणं॑ वा॒जिन॑माजि॒ घर्मि॑ मि॒त्रं प्र॑थिष्ठ-मु॒प या॑मि शर्म ।
 शि॒शानो॑ अ॒ग्निः क्र॑तुभिः-समि॒द्धः-स॒नो दि॒वा - [] 18

TS 1.2.14.7

स रिषः पातुनक्तं ॥

विज्योतिषा बृहता भात्यग्निराविर्विश्वानि कृणुतेमहित्वा ।

प्रादेवीर्मायाः सहते दुरेवाः शिशीते शृङ्गे रक्षसे विनिक्षे ॥

उत स्वानासो दिवि षन्त्वग्ने स्तिग्मायुधा रक्षसे हन्त वा उ ।

मदे चिदस्य प्र रुजन्ति भामा न वरन्ते परिबाधो अदेवीः ॥ 19

(अघशङ्सः-स ते-जरताङ्-रुजामि-ह - दिवै-

कचत्वारिङ्शच्च) (A14)

=====

अभिश्चरणमन्त्र जपारंभः

6 रक्षोहणो वलगहनः

TS 1.3.2.2

र॒क्षो॒ह॒णो॑ व॒लग॒हनो॑ वै॒ष्ण॒वान् ख॑नामी॒दम॑हं तं व॑लग॒मुद्-व॑पामि
यं नः॑ स॒मानो॑ यम॒स॒मानो॑ नि॒च॒खाने॑दमे॒नम॑धरं करोमि यो नः॑ स॒मानो॑
यो ऽस॒मानो॑ ऽरा॒ती॒यति॑ गाय॒त्रेण॑ छ॒न्द॒सा ऽव॑बाढो व॒लगः॑ कि॒मत्र॑ भ॒द्रं
तन्नौ॑ स॒ह वि॒राड॑सि स॒प॒त्न॒हा स॒म्राड॑सि भ्रातृ॒व्य॒हा
स्व॒राड॑स्यभि॒माति॑हा वि॒श्वा॒राड॑सि वि॒श्वा॒सां ना॒ष्ट्राणां॑ ह॒न्ता -[] 20

TS 1.3.2.2

र॒क्षो॒ह॒णो॑ व॒लग॒हनः॑ प्रो॒क्षामि॑ वै॒ष्ण॒वान् र॒क्षो॒ह॒णो॑ व॒लग॒हनो॑ ऽव
न॒यामि॑ वै॒ष्ण॒वान् यवो॑ ऽसि य॒वया॑स्मद् द्वेषो॑ य॒वया॑रा॒ती र॒क्षो॒ह॒णो॑
व॒लग॒हनो॑ ऽव स्तृ॒णामि॑ वै॒ष्ण॒वान् र॒क्षो॒ह॒णो॑ व॒लग॒हनो॑ ऽभि जु॒होमि॑
वै॒ष्ण॒वान् र॒क्षो॒ह॒णौ॑ व॒लग॒ह॒नावु॑प द॒धामि॑ वै॒ष्ण॒वी र॒क्षो॒ह॒णौ॑ व॒लग॒हनौ॑
पर्यू॒हामि॑ वै॒ष्ण॒वी र॒क्षो॒ह॒णौ॑ व॒लग॒हनौ॑ परि॑ स्तृ॒णामि॑ वै॒ष्ण॒वी र॒क्षो॒ह॒णौ॑
व॒लग॒हनौ॑ वै॒ष्ण॒वी बृ॒ह॒न्न॒सि बृ॒ह॒द्ग्रा॑वा बृ॒ह॒तीमि॑न्द्रा॒य ()
वाचं॑ व॒द ॥ 21 (ह॒न्ते-न्द्रा॒य द्वे च॑) (A2)

7 सोमाय पितृमते

TS 1.8.5.1

सो॒माय॑ पि॒तृम॑ते पु॒रोडा॑शं षट्क॑पालं निर्व॑पति पि॒तृभ्यो॑
बर्हि॑षद्भ्यो॑ धा॒नाः पि॒तृभ्यो॑ ऽग्नि॑ष्वा॒त्तेभ्यो॑ ऽभिवा॑न्यायै दु॒ग्धे
म॒न्थमे॒तत् ते॑ त॒त ये च॒ त्वा-म॑न्वे॒तत् ते॑ पि॒ताम॑ह प्र॒पिता॑म॒ह ये च॒
त्वा॒मन्व॑त्र पि॒तरो॑ यथाभा॒गं म॑न्द॒ध्वं सु॑स॒न्दृशं॑ त्वा व॒यं म॑घवन्
म॒न्दिषी॑महि ।

प्र नू॒नं पू॒र्णव॑न्धुरः स्तु॒तो या॑सि व॒शा अनु॑ ।
यो॒जा न्वि॑न्द्र ते॒ हरी॑ ॥ 22

TS 1.8.5.2

अक्ष॑न्नमी॒मद॑न्त ह्यव॑ प्रि॒या अ॑धूषत ।
अस्तो॑षत स्वभा॒नवो॑ वि॒प्रा न॑वि॒ष्टया॑ म॒ती ।
यो॒जा न्वि॑न्द्र ते॒ हरी॑ ॥
अक्ष॑न् पि॒तरो॑ ऽमी॒मद॑न्त पि॒तरो॑ ऽती॒तृप॑न्त पि॒तरो॑ ऽमी॒मृज॑न्त पि॒तरः॑ ॥
परे॑त पि॒तरः॑ सो॒म्या ग॑म्भीरैः प॒थिभिः॑ पू॒र्व्यैः ।
अथा॑ पि॒तृन्थ॑ सु॒विद॑न्ना॒ अपी॑त य॒मेन॒ ये स॑ध॒मादं॑ म॒दन्ति॑ ॥

मनो॒ न्वा हु॒वामहे॑ नारा॒श॒सेन॒ स्तोमे॑न पि॒तृणां॑ च॒ मन्म॑भिः ॥

आ - [] 23

TS 1.8.5.3

न ए॒तु मनः॑ पुनः॑ क्र॒त्वे द॑क्षाय जी॒वसे॑ ॥

ज्योक् च॒ सूर्यं॑ दृ॒शे ॥

पुन॑र्नः पि॒तरो॑ मनो॒ ददा॑तु दै॒व्यो ज॑नः ।

जी॒वं व्रा॑त॒स् स॑चेमहि ॥

यद॒न्तरि॑क्षं पृथि॒वीमु॑त द्यां य॒न्मा॒तरं॑ पि॒तरं॑ वा जिहि॒स्मि ॥

अ॒ग्निर्मा॒ तस्मा॑दे॒नसो॒ गा॒र्ह॒पत्यः॑ प्र मुञ्च॑तु दु॒रिता॑ या॒नि च॑कृ॒म

क॒रोतु॑ मा-म॒नेन॑सं ॥ 24

(ह॒री-म॒न्म॒भिरा-च॑तुश्च॒त्वारि॑श॒च्च) (A5)

8 उ॒श॒न्त॒स्त्वा ह॒वाम॑ह उ॒श॒न्तः

उ॒श॒न्त॒स्त्वा ह॒वाम॑ह उ॒श॒न्तः॑ स॒मि॒धीम॑हि ।

उ॒श॒न्नु॒श॒त आ॑ वह पि॒तृन् ह॒विषे॑ अ॒त्तवे॑ ॥

त्व॒स् सोम॑ प्रचि॒कितो॑ म॒नीषा॑ त्व॒स् रजि॑ष्ठ॒मनु॑ ने॒षि प॒न्थां ॥

तव प्रणीती पितरो न इन्दो देवेषु रत्नमभजन्त धीराः ॥
 त्वया हि नः पितरः सोम पूर्वे कर्माणि चक्रुः पवमान धीराः ।
 वन्वन्नवातः परिधीं रपोर्णु वीरेभिरश्वैर्मघवा भवा - [] 25

TS 2.6.12.2

नः ॥
 त्वं सोम पितृभिः सँविदानोऽनु द्यावापृथिवी आ ततन्थ ।
 तस्मै त इन्दो हविषा विधेम वयं स्याम पतयो रयीणां ॥
 अग्निष्वात्ताः पितर एह गच्छत सदःसदः सदत सुप्रणीतयः ।
 अत्ता हवींषि प्रयतानि बर्हिष्यथा रयिं सर्ववीरं दधातन ॥
 बर्हिषदः पितर ऊत्यर्वागिमा वो हव्या चकृमा जुषद्ध्वं ।
 त आ गताऽवसा शन्तमेनाथास्मभ्यं - [] 26

TS 2.6.12.3

शं यो-ररपो दधात ॥
 आऽहं पितृन्थ सुविदन्नां अविथ्सि नपातं च विक्रमणं च विष्णोः ।
 बर्हिषदो ये स्वधया सुतस्य भजन्त पित्वस्त इहाऽऽ गमिष्ठाः ॥
 उपहूताः पितरः सोम्यासो बर्हिष्येषु निधिषु प्रियेषु ।

त आ गमन्तु त इह श्रुवन्त्वधि ब्रुवन्तु ते अवन्त्वस्मान् ॥
उदीरता-मवर उत् परास उन्मद्ध्यमाः पितरः सोम्यासः ।

असुं - [] 27

TS 2.6.12.4

य ईयु-रवृका ऋतज्ञास्ते नोऽवन्तु पितरो हवेषु ॥
इदं पितृभ्यो नमो अस्त्वद्य ये पूर्वासो य उपरास ईयुः ।
ये पार्थिवे रजस्या निषत्ता ये वा नूनं सुवृजनासु विक्षु ॥
अथा यथा नः पितरः परासः प्रत्नासो अग्न ऋतमाशुषाणाः ।
शुचीदयन् दीधिति-मुक्थशासः क्षामा भिन्दन्तो अरुणीरप व्रन् ॥
यदग्ने - [] 28

TS 2.6.12.5

कव्यवाहन पितृन् यक्ष्यतावृधः ।
प्र च हव्यानि वक्ष्यसि देवेभ्यश्च पितृभ्य आ ॥
त्वमग्न ईडितो जातवेदोऽवाङ्ढव्यानि सुरभीणि कृत्वा ।
प्रादाः पितृभ्यः स्वधया ते अक्षन्नद्धि त्वं देव प्रयता हवींषि ॥

मा॒तली॑ क॒व्यैर्य॑मो अङ्गि॑रोभि॒ बृ॒ह॒स्पति॑र्. ऋ॒क्वभि॑ वा॒वृ॒धानः॑ ।
या॒७श्च॑ दे॒वा वा॑वृ॒धुर्ये॑ च दे॒वान्थ् स्वा॒हा॒ऽन्ये स्व॒धया॒ऽन्ये म॑दन्ति ॥ 29

TS 2.6.12.6

इ॒मं य॑म प्र॒स्तर॑-मा हि सी॒दाऽङ्गि॑रोभिः पि॒तृभिः॑ सँ॒वि॒दा॒नः ।
आ त्वा मन्त्राः॑ क॒वि॒श॒स्ता व॑हन्त्वे॒ना रा॑जन्. ह॒विषा॑ मा॒दय॑स्व ॥
अङ्गि॑रोभि॒रा ग॑हि य॒ज्ञिये॑भि॒र्यम॑ वैरू॒पै-रि॒ह मा॑दयस्व ।
वि॒व॒स्वन्त॑ ७ हु॒वे यः पि॒ता ते॒ऽस्मिन्. य॒ज्ञे ब॒र्हिष्या॑ नि॒षद्य॑ ॥
अङ्गि॑रसो नः पि॒तरो॑ न॒व॒ग्वा अ॑थ॒र्वा॒णो भृ॑गवः सो॒म्यासः॑ ।
तेषां॑ व॒य ७ सु॑म॒तौ य॒ज्ञिया॑ना॒मपि॑ भ॒द्रे सौ॑म॒नसे॑ () स्या॒म ॥ 30
(भ॒वा - स्म॒भ्य - म॒सुं - य॑द॒ग्ने - म॑दन्ति - सौ॒म॒न॒स ए॒कं च॑)

9 भक्षेहि माऽऽविश

TS 3.2.5.1

भक्षे॑हि माऽऽ वि॒श दी॑र्घायु॒त्वाय॑ श॒न्तनु॒त्वाय॑ रा॒य॒स्पोषा॑य
व॒र्च॑से सु॒प्र॒जा॒स्त्वाये॑हि व॒सो पु॑रोव॒सो प्रि॒यो मे हृ॒दोऽस्य॑श्चि॒नो॒स्त्वा
बा॒हु॒भ्या ७ स॒ध्यासं॑ नृ॒चक्ष॑सं त्वा दे॒व सो॒म सु॒च॒क्षा अव॑ ख्येषं
म॒न्द्रा ऽभि॑भूतिः के॒तु॒र्य॒ज्ञानां॑ वा॒ग्जुषा॑णा सोम॒स्य तृ॑प्यतु म॒न्द्रा

स्वर्वा॒च्यदि॒तिर॒ना॒हत॒शी॒र्ष्णी॒ वा॒ग्जु॒षा॒णा सोम॒स्य तृ॒प्य॒त्वे॒हि

वि॒श्वच॒र्षणे॒ – [] 31

TS 3.2.5.2

श॒म्भूर्म॒योभूः॒ स्व॒स्ति मा॒ हरि॒वर्ण॑ प्र च॒र क्र॒त्वे दक्षाय॑ रा॒यस्पोषाय॑
सु॒वीर॒तायै॑ मा मा॒ राज॒न् वि बी॒भिषो॑ मा मे॒ हा॒र्दि त्विषा॑ व॒धीः ।
वृष॑णे शु॒ष्मायाऽऽयु॑षे वर्च॑से ॥

व॒सुम॒द्गण॑स्य सोम॒ देव॑ ते म॒तिवि॒दः प्रा॒तस्स॒वन॑स्य गाय॒त्रछ॑न्द॒स
इ॒न्द्रपी॑तस्य न॒राश॑ꣳसपी॒तस्य॑ पि॒तृपी॑तस्य म॒धुम॑त उप॒हूत॑स्योप॒हूतो॑
भक्ष॑यामि रु॒द्रव॑द्गण॒स्य सोम॑ देव॒ ते म॒तिवि॒दो मा॒द्ध्य॑न्दिन॒स्य
स॒वन॑स्य त्रि॒ष्टुछ॑न्द॒स इ॒न्द्रपी॑तस्य न॒राश॑ꣳसपी॒तस्य॑ – [] 32

TS 3.2.5.3

पि॒तृपी॑तस्य म॒धुम॑त उप॒हूत॑स्योप॒हूतो॑ भक्ष॑याम्यादि॒त्यव॑द्गण॒स्य
सोम॑ देव॒ ते म॒तिवि॒दस्तृ॑तीय॒स्य स॒वन॑स्य जग॒तीछ॑न्द॒स इ॒न्द्रपी॑तस्य
न॒राश॑ꣳसपी॒तस्य॑ पि॒तृपी॑तस्य म॒धुम॑त उप॒हूत॑स्योप॒हूतो॑ भक्ष॑यामि ॥
आ प्या॑यस्व॒ समे॑तु ते वि॒श्वतः॑ सोम॒ वृष्णि॑यं ।
भवा॑ वा॒जस्य॑ स॒ङ्ग॒थे ॥

हि॒न्व मे॑ गा॒त्रा हरि॒वो ग॒णान् मे॑ मा वि॒तीतृ॑षः ।

शि॒वो मे॑ स॒प्तर्षी॑नुप॒ तिष्ठ॑स्व मा मे॒ऽवाङ्नाभि॑मति॒ - [] 33

TS 3.2.5.4

गाः ॥

अपा॑म सोम॑ममृ॒ता अभू॑माऽद॒श्म ज्योति॑रवि॒दाम दे॒वान् ।

किम॑स्मान् कृ॒णव॑दरातिः॒ किमु॑ धू॒र्तिर॑मृत॒ मर्त्य॑स्य ॥

यन्म॑ आ॒त्मनो॑ मि॒न्दा ऽभू॑द॒ग्निस्त॑त् पुन॒रा ऽहा॑र्जा॒तवे॑दा वि॒चर्ष॑णिः ॥

पुन॑र॒ग्निश्चक्षु॑रदात्-पुन॑रिन्द्रो बृ॒हस्प॑तिः ।

पुन॑र्मे अ॒श्विना यु॒वं चक्षु॑रा ध॒त्तम॑क्ष्योः ॥

इष्ट॑यजुषस्ते दे॒व सोम॑ स्तु॒तस्तो॑मस्य - [] 34

TS 3.2.5.5

श॒स्तोक्थ॑स्य हरि॒वत॑ इन्द्र॑पीतस्य मधु॑मत॒ उप॑हूतस्योप॑हूतो

भक्ष॑यामि ॥ आ॒पूर्याः॒ स्थाऽऽ मा पू॑रयत प्र॒जया॑ च ध॒नेन॑ च ॥

ए॒तत् ते॑ त॒त ये च॑ त्वामन्वे॒तत् ते॑ पि॒ताम॑ह प्र॒पिता॑मह॒ ये च॑ त्वामन्व॒त्र

पि॒तरो य॑थाभा॒गं म॑न्द॒ध्वं नमो॑ वः पि॒तरो र॑साय॒ नमो॑ वः पि॒तरः॑

शु॒ष्माय॑ नमो॑ वः पि॒तरो जी॒वाय॑ नमो॑ वः पि॒तरः॑ - [] 35

TS 3.2.5.6

स्व॒धा॒यै॑ नमो॑ वः पि॒तरो॑ म॒न्यवे॑ नमो॑ वः पि॒तरो॑ घो॒राय॑ पि॒तरो॑ नमो॑
 वो॒ य ए॒तस्मिन्॑ लो॒के॒स्थ यु॒ष्मा॒ऽस्ते॒ऽनु॒ ये॒ऽस्मिन्॑ लो॒के मां॑ ते॒ऽनु॒ य
 ए॒तस्मिन्॑ लो॒के स्थ॑ यू॒यं तेषां॑ व॒सि॒ष्ठा भू॒यास्त॑ ये॒ऽस्मिन्॑ लो॒के॒ऽहं
 तेषां॑ व॒सि॒ष्ठो भू॒यासं॑ प्र॒जाप॑ते न त्वदे॒तान्य॒न्यो वि॒श्वा जा॒तानि॑
 परि॒ ता ब॒भूव॑ । 36

TS 3.2.5.7

यत् का॒मास्ते॑ जुहु॒मस्तन्नो॑ अस्तु॒ वय॑ऽस्याम॒ पत॑यो र॒यीणां॑ ॥
 दे॒वकृ॑त॒स्यै॒नसो॑ ऽव॒यज॑नम॒सि म॒नुष्य॑कृ॒तस्यै॒नसो॑ ऽव॒यज॑नम॒सि
 पि॒तृकृ॑त॒स्यै॒नसो॑ ऽव॒यज॑नम॒स्यप्सु॑ धौ॒तस्य॑ सोम॒ देव॑ ते नृ॒भिः
 सु॒तस्ये॒ष्टय॑ जुषः॒ स्तुत॑स्तो॒मस्य॑ श॒स्तोक्थ॑स्य॒ यो भ॒क्षोअ॑श्च॒सनिर्यो॑
 गो॒सनि॑स्तस्य॒ ते पि॒तृभि॑र्भ॒क्षंकृ॑त॒स्योप॑हू॒तस्योप॑हू॒तो भ॒क्षयामि॑ ॥ 37

(वि॒श्वच॑र्ष॒णे - त्रि॒ष्टुच्छ॑न्द॒स इन्द्र॑पी॒तस्य॑ न॒राश॑ऽस॒पीत॑स्या - ऽति॑
 -स्तु॑त॒स्तोम॑स्य - जी॒वाय॑ नमो॑ वः पि॒तरो॑ - ब॒भूव॑ -
 चतु॑श्च॒त्वारि॑ऽश॒च्च) (A5)

10 ध्रुवाऽसि धरुणाऽस्तृता

ध्रु॒वाऽसि॑ ध॒रुणाऽस्तृ॑ता वि॒श्वक॑र्म॒णा सु॒कृ॒ता ।
मा त्वा॑ स॒मु॒द्र उ॒द्व॒धीन्मा॑ सु॒प॒र्णो ऽव्य॑थ॒माना॑ पृ॒थि॒वीं दृ॒ह ॥
प्र॒जाप॑तिस्त्वा सादयतु पृ॒थि॒व्याः पृ॒ष्ठे व्य॑च॒स्वतीं॑ प्र॒थ॒स्वतीं॑ प्र॒थोऽसि॑
पृ॒थि॒व्यसि॑ भू॒रसि॑ भू॒मिर॒स्यदि॑तिरसि वि॒श्वधा॑या वि॒श्वस्य॑ भु॒वन॒स्य
ध॒र्त्री पृ॒थि॒वीं य॑च्छ पृ॒थि॒वीं दृ॒ह पृ॒थि॒वीं मा हि॒॑सीर्वि॑श्व॒स्मै
प्रा॒णाया॑पा॒नाय॑ व्या॒नायो॑दा॒नाय॑ प्रति॒ष्ठायै॑ – [] 38

TS 4.2.9.2

च॒रि॒त्राया॑ग्निस्त्वाऽभि॑ पा॒तु म॒ह्या स्व॒स्त्या छ॒र्दिषा॑ श॒न्तमे॑न
तया॑ दे॒वत॑याऽङ्गि॒रस्वद्-ध्रु॒वा सी॑द ॥
का॒ण्डा॒त्का॒ण्डा॒त् प्र॒रोह॑न्ती प॒रुषः॑प॒रुषः॑ परि॑ ।
ए॒वा नो॑ दू॒र्वे प्र॑ त॒नु स॒हस्रे॑ण श॒तेन॑ च ॥
या श॒तेन॑ प्र॒तनो॑षि स॒हस्रे॑ण वि॒रोह॑सि ।
तस्या॑स्ते दे॒वीष्ट॑के वि॒धेम॑ ह॒विषा॑ व॒यं ॥

अषाढाऽसि॑ सह॒माना॑ सह॒स्वारा॑तीः सह॒स्वारा॑ती॒यतः॑ सह॒स्व
पृ॒तनाः॑ सह॒स्व पृ॒तन्य॑तः ।

सह॒स्रवी॑र्या – [] 39

TS 4.2.9.3

–ऽसि॑ सा मा जि॒न्व ॥

मधु॑ वा॒ता ऋ॒ताय॑ते मधु॑ क्षर॒न्ति सि॒न्धवः॑ ।

मा॒द॒ध्वी॑र्नः स॒न्त्वोष॑धीः ॥

मधु॑ न॒क्तमु॑तोष॒सि मधु॑म॒त् पा॒र्थि॒वꣳ रजः॑ ।

मधु॑ द्यौ॒रस्तु॑ नः पि॒ता ॥

मधु॑मा॒न् नो व॒नस्प॑ति–म॒धुमाꣳ अस्तु॑ सूर्यः॑ ।

मा॒द॒ध्वी॑र्गा॒वो भव॑न्तु नः ॥

म॒ही द्यौः पृ॑थि॒वी च न इ॒मं य॒ज्ञं मि॑मिक्षतां ।

पि॒पृ॒तां नो भ॑रीम॒भिः ॥

तद्–वि॒ष्णाः॑ प॒रमं॑ – [] 40

TS 4.2.9.4

पद॑ सदा पश्यन्ति॑ सूरयः॑ ।
दिवी॑व चक्षु॑राततं ॥
ध्रुवा॑ऽसि पृथि॑वि सह॑स्व पृतन्य॑तः ।
स्यू॑ता दे॒वेभि॑रमृ॒तेना॑ऽऽ *गाः ॥
यास्ते॑ अग्ने॒ सूर्ये॑ रुच॑ उद्यतो दि॒वमा॑तन्वन्ति॑ र॒श्मिभिः॑ ।
ताभिः॑ सर्वा॑भी रु॒चे जना॑य न स्क्व॑धि ॥
या वो॑ दे॒वाः सूर्ये॑ रुचो॒ गोष्व॑श्चेषु॒ या रुचः॑ ।
इन्द्रा॑ग्नी ताभिः॑ सर्वा॑भी रुचं॑ नो धत्त बृह॑स्पते ॥

विराड् - [] 41

TS 4.2.9.5

ज्योति॑रधारयथ् स॒म्राड् ज्योति॑रधारयथ् स्व॒राड् ज्योति॑रधारयत् ॥
अग्ने॑ यु॒क्ष्वा हि ये तवा॑श्वासो दे॒व सा॑धवः ।
अरं॑ व॒हन्त्या॑शवः ॥
यु॒क्ष्वा हि दे॒वहू॑तमा॒ अश्वा॑ अग्ने॒ रथी॑रिव ।
नि होता॑ पू॒र्व्यः सदः॑ ॥

द्र॒प्सश्च॑स्क॒न्द पृ॒थि॒वीम॒नु द्या॒मिमं॑ च॒ योनि॑म॒नु यश्च॑ पूर्॒वः ।

तृ॒तीयं॑ यो॒निम॒नु स॒ञ्चर॑न्तं द्र॒प्सं जु॒हो॒म्यनु॑ स॒प्त - [] 42

TS 4.2.9.6

॥
हो॒त्राः ॥

अ॒भू॒दिदं॑ वि॒श्वस्य॑ भु॒वनस्य॑ वा॒जिन॑म॒ग्ने-वै॑श्वा॒नरस्य॑ च ।

अ॒ग्नि॒ज्योति॑षा ज्योति॑ष्मान् रु॒क्मो वर्च॑सा वर्च॑स्वान् ॥

ऋ॒चे त्वा रु॒चे त्वा स॒मिथ् स्र॑वन्ति स॒रितो॑ न धे॒नाः ॥

अ॒न्तर् ह॒दा म॒नसा॑ पू॒यमा॑नाः ॥

घृ॒तस्य॑ धा॒रा अ॒भि चा॑क॒शीमि॑ ।

हि॒र॒ण्य॒यो वे॒तसो॑ म॒द्ध्य आ॑सां ॥

तस्मि॑न्त्सु॒पर्णो म॑धुकृत् कु॒लायी॑ भज॒न्नास्ते॑ म॒धु दे॒वता॑भ्यः ॥

तस्या॑सते ह॒रयः॑ स॒प्त ती॒रे () स्व॒धां दु॒हाना॑ अ॒मृत॑स्य धा॒रां ॥ 43

(प्र॒तिष्ठा॑यै - स॒हस्र॑वी॒र्या - प॒रमं॑ - वि॒राट् - स॒प्त - ती॒रे -

च॒त्वारि॑ च) (A9)

11 अ॒ग्न उद॑धे॒ या त इ॒षुः

TS 5.5.9.1

अ॒ग्न उद॑धे॒ या त इ॒षु॒र्यु॒वा ना॒म॒ तया॑ नो मृ॒ड तस्या॑स्ते नम॒ स्तस्या॑
स्त उप॒ जी॒वन्तो॑ भू॒यास्मा॒ग्ने दु॒ध्र ग॒ह्य कि॒ञ्शिल॑ वन्य॒ या त
इ॒षु॒र्यु॒वा ना॒म॒ तया॑ नो मृ॒ड तस्या॑स्ते नम॒ स्तस्या॑ स्त उप॒ जी॒वन्तो॑
भू॒यास्म॒ पञ्च॑ वा ए॒तेऽग्नयो॑ यच्चि॒तय॑ उद॒धिरे॒व ना॒म प्र॒थमो॑

दु॒ध्रो- [] 44

TS 5.5.9.2

द्वि॒तीयो ग॒ह्यस्तृ॑तीयः कि॒ञ्शिल॑श्चतु॒र्थो वन्यः॑ पञ्चमस्तेभ्यो
यदाहु॑तीर्न जुहु॒याद॑ध्व॒र्युं च॑ यज॒मानं॑ च प्र दहे॒युर्य॑देता
आहु॑तीर्जुहोति॒ भाग॑धेयेनै॒वैना॑ञ्छमयति॒ नाऽऽ*ति॑माच्छत्य॒ध्वर्यु॑र्न
यज॑मानो वाङ् म आ॒सन् न॒सोः प्रा॒णोऽक्ष्यो॑श्चक्षुः॒ कर्ण॑योः श्रोत्रं
बाहु॑वोर्बल-मू॒रुवो॑रोजोऽरि॒ष्टा वि॒श्वान्य॑ङ्गानि॒ तनू॑ - [] 45

TS 5.5.9.3

-स्तनु॑वा मे स॒ह नम॑स्ते अस्तु॒ मा मा हि॒ञ्सी॒रप॒ वा ए॒तस्मा॑त्
प्रा॒णाः क्रा॑मन्ति॒ योऽग्निं॑ चिन्व-न्न॒धिक्रा॑मति॒ वाङ् म आ॒सन् न॒सोः
प्रा॒ण इ॒त्याह॑ प्रा॒णाने॒वाऽऽत्म॑न् धत्ते॒ यो रु॒द्रो अ॒ग्नौ यो अ॒प्सु

य ओषधीषु यो रुद्रो विश्वा भुवना ऽऽविवेश तस्मै रुद्राय नमो
अस्त्वाहुतिभागा वा अन्ये रुद्रा हविर्भागा - [] 46

TS 5.5.9.4

अन्ये शतरुद्रीयं हुत्वा गावीधुकं चरुमेतेन यजुषा चरमायामिष्टकायां
नि दद्ध्याद्-भागधेयेनैवैनं शमयति तस्य त्वै शतरुद्रीयं
हुतमित्याहुर्यस्यैतदग्नौ क्रियत इति वसवस्त्वा रुद्रैः पुरस्तात् पान्तु
पितरस्त्वा यमराजानः पितृभिर्दक्षिणतः पान्त्वादित्यास्त्वा विश्वैर्देवैः
पश्चात् पान्तु द्युतान स्त्वा मारुतो मरुद्धि-रुत्तरतः पातु - [] 47

TS 5.5.9.5

देवास्त्वेन्द्रज्येष्ठा वरुणराजानो ऽधस्ताच्चो-परिष्ठाच्च पान्तु
न वा एतेन पूतो न मेद्ध्यो न प्रोक्षितो यदेनमतः प्राचीनं प्रोक्षति
यथ् सज्चितमाज्येन प्रोक्षति तेन पूतस्तेन मेद्ध्यस्तेन प्रोक्षितः ॥ 48

(दुध - स्तनूर - हविर्भागाः - पातु - द्वात्रिंशच्च) (A9)

12 शिरो वा एतद् यज्ञस्य

शिरो वा एतद्-यज्ञस्य यद्धविर्धानं प्राणा उपरवा हविर्धाने
 खायन्ते तस्माच्छीर्षन् प्राणा अधस्तात् खायन्ते
 तस्मादधस्ताच्छीर्षः प्राणा रक्षोहणो वलगहनो वैष्णवान्
 खनामीत्याह वैष्णवा हि देवतयोपरवा असुरा वै निर्यन्तो देवानां
 प्राणेषु वलगान् न्यखनन् तान् बाहुमात्रे ऽन्वविन्दन् तस्माद् बाहुमात्राः
 खायन्त इदमहं तं वलगमुद्-वपामि- [] 49

TS 6.2.11.2

यं नः समानो य-मसमानो निचखानेत्याह द्वौ वाव पुरुषौ
 यश्चैव समानो यश्चासमानो यमेवास्मै तौ वलगं निखनतस्तमेवोद्-
 वपति सं तृणति तस्मात् सन्तृण्णा अन्तरतः प्राणा न सं भिनत्ति
 तस्मादसंभिन्नाः प्राणा अपो ऽव नयति तस्मादार्द्रा अन्तरतः प्राणा
 यवमतीरव नय- [] 50

TS 6.2.11.3

-त्यूर्वे यवः प्राणा उपरवाः प्राणेष्वेवोर्जं दधाति बर्हिर्व स्तृणाति
 तस्माल्लोमशा अन्तरतः प्राणा आज्येन व्याधारयति तेजो वा आज्यं

प्रा॒णा उप॒रवाः प्रा॒णेष्वे॒व ते॒जो द॒धाति॑ ह॒नू वा ए॒ते य॒ज्ञस्य॑
यदधि॑षव॒णे न सं तृ॒ण॒त्यस॑न्तृ॒ण्णे हि ह॒नू अथो॑ ख॒लु दी॒र्घसो॒मे
संतृ॑द्ये धृ॒त्यै शि॒रो वा ए॒तद्-य॒ज्ञस्य॑ य॒द्धवि॑र्द्धानं- [] 51

TS 6.2.11.4

प्रा॒णा उप॒रवा॑ ह॒नू अधि॑षव॒णे जि॒ह्वा च॒र्म ग्रा॒वा॒णो द॒न्ता
मु॒खमा॑ह॒वनी॒यो ना॑सि॒को-त॒रवे॑दि-रु॒दर॑ꣳ स॒दो य॒दा ख॒लु वै
जि॒ह्वया॑ द॒थ्स्वधि॑ खा॒दत्य॑थ॒ मुखं॑ गच्छति॒ यदा॑ मुखं॒ गच्छ॑त्यथो॒दरं
गच्छ॑ति तस्मा॑द्धवि॑र्द्धाने च॒र्म॒न्नाधि॑ ग्रा॒वभि॑-र॒भिषु॑त्याऽऽह॒वनी॒ये हु॒त्वा
प्र॒त्यञ्चः॑ प॒रेत्य॑ स॒दसि॑ भक्षयन्ति॒ यो वै वि॒राजो॑ य॒ज्ञमु॒खे दोहं॑ वैद
दुह॑ ए॒वै () ना॑मि॒यं वै वि॒राट् तस्यै॑ त्वक् च॒र्मो॒धो ऽधि॑षव॒णे
स्त॒ना उप॒रवा॑ ग्रा॒वा॒णो व॒थ्सा ऋ॒त्विजो॑ दुहन्ति॒ सोमः॑ प॒यो
य ए॒वं वैद॑ दुह॒ ए॒वैनां॑ ॥ 52

(व॒पा॒मि-य॒व॒म॒ती॒रव॑ न॒यति॑-ह॒वि॒र्द्धानं॑-मे॒व-त्रयो॑वि॒ंशति॑श्च) (A11)

13 असावादित्यो ऽस्मिन् ँलोक

TS 7.3.10.1

अ॒सा॒वा॒दि॒त्यो॑ ऽस्मिन् ँ॒लो॒क आ॒सी॒त् तं दे॒वाः पृ॒ष्ठैः॑ परि॒गृह्य॑ सु॒वर्गं॑
 ँ॒लो॒कम॑गमयन् परै॒रव॑स्तात् पर्य॑गृह्णन् दि॒वाकी॒र्त्येन॑ सु॒वर्गे॑ लो॒के
 प्र॒त्य॒स्था॒पय॑न् परैः॑ पर॒स्तात् पर्य॑गृह्णन् पृ॒ष्ठैरु॒पावा॑रोहन्त्स वा
 अ॒सा॒वा॒दि॒त्यो॑ ऽमु॒ष्मिन् ँ॒लो॒के परै॒रुभ॑यतः परि॒गृही॑तो यत् पृ॒ष्ठानि॑
 भव॑न्ति सु॒वर्गमे॒व तैर्लो॒कं य॑ज॒माना॑ यन्ति परै॒रव॑स्तात् परि॑ गृह्णन्ति
 दि॒वाकी॒र्त्येन॑ – [] 53

TS 7.3.10.2

सु॒वर्गे॑ लो॒के प्र॒ति ति॑ष्ठन्ति परैः॑ पर॒स्तात् परि॑ गृह्णन्ति पृ॒ष्ठैरु॒पाव॑रोहन्ति
 यत् परे॑ पर॒स्तान्न॑ स्युः परा॑ञ्चः सु॒वर्गा॑-ल्लो॒कान्नि॑ष्पद्येरन्.
 यद॒वस्तान्न॑ स्युः प्र॒जा निर्द॑हेयुरभि॒तो दि॒वाकी॒र्त्यं पर॑स्सामानो भवन्ति
 सु॒वर्ग ए॒वैनान् ँ॒लो॒क उ॑भयतः परि॑ गृह्णन्ति यज॒माना॑ वै दि॒वाकी॒र्त्यं
 सँव॑त्सरः पर॒स्सामानो॑ ऽभि॒तो दि॒वाकी॒र्त्यं पर॑स्सामानो भवन्ति
 सँव॑त्सर ए॒वोभ॑यतः – [] 54

TS 7.3.10.3

प्रति॑ तिष्ठन्ति॑ पृ॒ष्ठं वै॑ दि॒वाकी॒र्त्यं पा॒र्श्वे पर॑स्सामानो ऽभितो॑
 दि॒वाकी॒र्त्यं पर॑स्सामानो भवन्ति॑ तस्मा॑द॒भितः॑ पृ॒ष्ठं पा॒र्श्वे
 भूयि॑ष्ठा ग्र॒हा गृह्य॑न्ते भूयि॑ष्ठं शस्यते॑ य॒ज्ञस्यै॒व तन्म॑द्ध्यतो
 ग्रन्थिं॑ ग्र॒थन्त्य॑वि॒स्रञ्साय॑ स॒प्त गृह्य॑न्ते स॒प्त वै शी॑र्ष॒ण्याः॑
 प्रा॒णाः प्रा॒णाने॒व यज॑मानेषु दधति॑ यत् प॒राची॑नानि पृ॒ष्ठानि॑
 भव॑न्त्यमु॒मेव तै॑-लो॒कम॒भ्यारो॑हन्ति॒ यदि॑मं लो॒कं न - [] 55

TS 7.3.10.4

प्रत्य॑व-रोहे॒युरु॑द्-वा मा॒द्येयु॑र्यज॒मानाः॑ प्र वा मी॒येरन्॑. यत्
 प्र॒तीची॑नानि पृ॒ष्ठानि॑ भव॑न्तीममे॒व तै॒र्लो॒कं प्र॒त्यव॑रोह॒न्त्यथो॑ अ॒स्मिन्ने॒व
 लो॒के प्र॒ति तिष्ठ॑न्त्यनु॒न्मादा॑येन्द्रो वा अ॒प्रति॑ष्ठित आसी॒त् स प्र॒जाप॑ति
 -मु॒पाधा॑वत् तस्मा॑ ए॒तमे॑कवि॒ंशति॑रात्रं प्राय॑च्छत् तमा ऽहर॑त्
 तेना॑यजत॒ ततो॑ वै स प्र॒त्यति॑ष्ठद्-ये बहु॒याजिनो॑ ऽप्रति॑ष्ठिताः- [] 56

TS 7.3.10.5

स्यु॒स्त एक॑वि॒ंशति॑रात्र-मा॒सीरन्॑ द्वाद॒श मा॒साः पञ्च॑र्तव॒स्त्रय॑ इ॒मे
 लो॒का अ॒सावा॑दित्य॒ एक॑वि॒ंश ए॒ताव॑न्तो वै दे॒वलो॒कास्तेष्वे॒व

यथापूर्वं प्रति तिष्ठन्त्यसावादित्यो न व्यरोचत स प्रजापतिमुपाधावत्
तस्मा एतमेकविंशतिरात्रं प्रायच्छत् तमा ऽहरत् तेनायजत ततो वै
सो ऽरोचत य एवं विद्वाँस एकविंशतिरात्रमासते () रोचन्त
एवैकविंशतिरात्रो भवति रुग्वा एकविंशो रुचमेव गच्छन्त्यथो
प्रतिष्ठामेव प्रतिष्ठा ह्येकविंशो ऽतिरात्रावभितो भवतो ब्रह्मवर्चसस्य
परिगृहीत्यै ॥ 57

(गृह्णन्ति दिवाकीर्त्यै - वोभयतो - ना - प्रतिष्ठिता - आसत -
एकविंशतिश्च) (A10)

14 सन्ततिर्वा एते ग्रहाः

TB 1.2.3.1

सन्ततिर्वा एते ग्रहाः । यत् परः सामानः । विषूवान्-दिवाकीर्त्यम् ।
यथा शालायै पक्षसी । एवँ सँवथ्सरस्य पक्षसी ।
यदेतेन गृह्येरन् । विषूची सँवथ्सरस्य पक्षसी व्यवस्रँ सेयाताम् ।
आर्तिमाच्छैयुः । यदेते गृह्यन्ते ।
यथा शालायै पक्षसी मद्ध्यमं वँशमभि समायच्छति । 58

TB 1.2.3.2

ए॒व॒ ऽ सँ॑व॒थ्स॒रस्य॒ पक्ष॑सी दि॒वाकी॑र्त्य॒म॒भि सं॑त॒न्वन्ति॑ ।
 ना॒र्तिमा॑च्छ॒न्ति ॥ ए॒क॒वि॒ंश॒-म॑ह॒र्भव॑ति । शु॒क्रा॒ग्रा ग्र॑हा गृ॒ह्यन्ते॑ ।
 प्र॒त्युत्त॑ब्ध्यै स॒य॒त्वाय॑ ॥ सौ॒र्य ए॒तद॑हः प॒शुरा॑ल॒भ्यते॑ ।
 सौ॒र्योऽति॑ग्रा॒ह्यो गृ॑ह्यते । अ॒हरे॒व रू॒पेण॑ स॒म॒र्द्धय॑न्ति ।
 अथो॒ अ॒ह ए॒वैष॑ ब॒लिर् ह्रि॑यते ॥
 स॒प्तै-त॑द॒हर॑ति-ग्रा॒ह्या गृ॑ह्यन्ते । 59

TB 1.2.3.3

स॒प्त वै शी॑र्ष॒ण्याः प्रा॒णाः । अ॒सा॒वादि॒त्यः शि॑रः प्र॒जाना॑म् ।
 शी॒र्ष॒न्ने॒व प्र॒जाना॑ं प्रा॒णान् द॑धाति । तस्मा॑त्स॒प्त शी॑र्ष॒न् प्रा॒णाः ॥
 इन्द्रो॑ वृ॒त्रं ह॒त्वा । अ॒सुरा॑न् प॒राभा॑व्य । स इ॒मान् लो॒का-न॑भ्यजयत् ।
 तस्या॒सौ लो॒कोऽन॑भिजित आसीत् । तं वि॒श्वक॑र्मा भू॒त्वाऽभ्य॑जयत् ।
 यद्-वै॑श्वक॒र्मणो॑ गृ॒ह्यते॑ ॥ 60

TB 1.2.3.4

सु॒व॒र्गस्य॑ लो॒कस्या॑भिजित्यै ॥ प्र वा ए॒तैऽस्मा॑ल् लो॒का-च॑च्यवन्ते ।
 ये वै॑श्वक॒र्मणं॑ गृ॒ह्यते॑ । आ॒दि॒त्यश्चो॑ गृ॒ह्यते॑ । इ॒यं वा॑ अ॒दितिः॑ ।

अस्यामे॒व प्र॒ति॒ति॒ष्ठन्ति॑ ॥ अ॒न्यो॒न्यो गृ॒ह्येते॑ ।
विश्वा॑न्ये॒वान्ये॒न क॒र्माणि॑ कु॒र्वाणा॑ य॒न्ति । अ॒स्याम॒न्ये॒न प्र॒ति॒ति॒ष्ठन्ति॑ ॥
तावाऽप॑रार्द्धा॒थ् सँव॑त्सरस्या॒न्यो॒न्यो गृ॒ह्येते॑ () ॥
तावु॒भौ स॒ह म॒हाव॑रते गृ॒ह्येते॑ । य॒ज्ञस्यै॒वान्तं॑ ग॒त्वा ।
उ॒भयो॑र् लो॒कयोः॑ प्र॒ति ति॒ष्ठन्ति॑ ॥ अ॒र्क्यमु॒क्थं भ॑वति ।
अ॒न्नाद्य॑स्याव॒रुद्ध्यै॑ ॥ 61
(स॒माय॑च्छ – त्य॒तिग्रा॑ह्या गृ॒ह्यन्ते॑ – गृ॒ह्यते॑ – सँव॑त्सरस्या॒न्यो॒न्यो
गृ॒ह्येते॑ पञ्च च)

15 एकविंश एष भवति

TB 1.2.4.1

ए॒क॒वि॒ंश ए॒ष भ॑वति । ए॒तेन॑ वै दे॒वा ए॒क॒वि॒ंशेन॑ ।
आ॒दि॒त्यमि॒त उत्त॑मं सु॒वर्गं॑ लो॒क-मा॑रोहयन् ।
स वा ए॒ष इ॒त ए॒क॒वि॒ंशः । तस्य॑ द॒शाव॑स्ताद॒हानि॑ । द॒श प॑रस्तात् ॥
स वा ए॒ष वि॒राज्यु॑भयतः प्र॒तिष्ठि॑तः ।

विराजि॑ हि वा ए॒ष उ॒भयतः॑ प्रति॒ष्ठितः॑ । तस्मा॑दन्त॒रेमौ॑ लो॒कौ यन् ।
सर्वे॑षु सुव॒र्गेषु॑ लो॒के-ष्वभि॑तप॒न्नेति॑ ॥ 62

TB 1.2.4.2

दे॒वा वा आ॒दि॒त्यस्य॑ सु॒वर्गस्य॑ लो॒कस्य॑ । परा॑चोऽतिपा॒दाद॑बिभयुः ।
तं छन्दो॑भिरदृ॒ष्टुं ह॒न्धृत्यै॑ । दे॒वा वा आ॒दि॒त्यस्य॑ सु॒वर्गस्य॑ लो॒कस्य॑ ।
अवा॑चोऽवपा॒दाद॑बिभयुः । तं पञ्च॑भी रश्मि॒भि-रु॑दवयन् ।
तस्मा॑देकवि॒ंशे ऽह॒न् पञ्च॑ दि॒वाकी॒र्त्यानि॑ क्रियन्ते ।
रश्म॑यो वै दि॒वाकी॒र्त्यानि॑ ॥ ये गा॑यत्रे ।
ते गा॑यत्रीषू॒त्तर॑योः पव॒मान॑योः । 63

TB 1.2.4.3

महा॑दि॒वाकी॒र्त्यं हो॑तुः पृ॒ष्ठम् । वि॒कर्णं॑ ब्र॒ह्मसा॒मम् । भा॒सोऽग्नि॑ष्टोमः ॥
अथै॑तानि परा॒णि । परै॒र्वै दे॒वा आ॒दि॒त्यं सु॒वर्गं॑ लो॒कम॑पा॒रय॑न् ।
यद॑पा॒रय॑न् । तत् परा॒णां पर॑त्वम् । पा॒रय॑न्त्ये॒नं परा॑णि । य ए॒वं वे॑द ।
अथै॑तानि स्पर्॒ाणि () । स्पर्॒ैर्वै दे॒वा आ॒दि॒त्यं सु॒वर्गं॑ लो॒कम॑स्पा॒रय॑न् ।
यद॑स्पा॒रय॑न् । तथ् स्पर्॒ाणां स्पर्॑त्वम् । स्पा॒रय॑न्त्ये॒नं स्पर्॑ाणि ।
य ए॒वं वे॑द ॥ 64 (ए॒ति-प॒व॒मान॑योः-स्पर्॒ाणी पञ्च॑ च)

16 इन्द्रो वृत्रं हत्वा

TB 1.3.10.1

इन्द्रो वृत्रं हत्वा । असुरान् पराभाव्य । सोऽमावास्यां प्रत्यागच्छत् ।
ते पितरः पूर्वेद्यु-रागच्छन् । पितृन् यज्ञोऽगच्छत् ।
तं देवाः पुनरयाचन्त । तमेभ्यो न पुनरददुः ।
तेऽब्रुवन् वरं वृणामहे ।
अथ वः पुनर्दास्यामः ।
अस्मभ्यमेव पूर्वेद्युः क्रियाता इति । 65

TB 1.3.10.2

तमेभ्यः पुनरददुः । तस्मात्-पितृभ्यः पूर्वेद्युः क्रियते ।
यत् पितृभ्यः पूर्वेद्युः करोति ।
पितृभ्य एव तद्-यज्ञं निष्क्रीय यजमानः प्रतनुते ॥
सोमाय पितृपीताय स्वधा नम इत्याह ।
पितुरेवाधि सोमपीथमवरुन्धे ।
न हि पिता प्रमीयमाण आहैष सोमपीथ इति ।

इन्द्रियं वै सोमपीथः । इन्द्रियमेव सोमपीथमवरुन्धे ।

तेनेन्द्रियेण द्वितीयां जायामभ्यश्नुते ॥ 66

TB 1.3.10.3

एतद् वै ब्राह्मणं पुरा वाजश्चवसा विदामक्रन् ।

तस्मात् ते द्वे जाये अभ्याक्षत । य एवं वेद ।

अभि द्वितीयां जायामश्नुते ॥

अग्नये कव्यवाहनाय स्वधा नम इत्याह । य एव पितृणामग्निः ।

तं प्रीणाति ॥ तिस्र आहुतीर् जुहोति ॥ त्रिर्निदधाति ॥

षट्थं संपद्यन्ते । 67

TB 1.3.10.4

षड्वा ऋतवः । ऋतूनेव प्रीणाति ॥ तूष्णीं मेक्षणमादधाति ।

अस्ति वा हि षष्ठ ऋतुर्न वा ॥ देवान् वै पितृन् प्रीतान् ।

मनुष्याः पितरोऽनुप्रपिपते । तिस्र आहुतीर् जुहोति । त्रिर्निदधाति ।

षट्थं संपद्यन्ते । षड्वा ऋतवः । 68

TB 1.3.10.5

ऋतवः खलु वै देवाः पितरः । ऋतूनेव देवान् पितृन् प्रीणाति ।

तान्प्रीतान् । मनुष्याः पितरोऽनुप्रपिपते ॥

सकृ॒दाच्छि॒न्नं ब॒र्हिर् भ॒वति॑ । सकृ॒दिव॒ हि पि॒तरः॑ ॥ त्रि॒र्नि॒दधा॑ति ।
तृ॒तीये॑ वा इ॒तो लो॒के पि॒तरः॑ । ताने॒व प्री॑णाति ॥

परा॒डाव॑र्तते । 69

TB 1.3.10.6

ह्री॒का हि पि॒तरः॑ ॥ ओष्म॑णो॒ व्यावृ॑त उ॒पास्ते॑ ।
ऊ॒ष्मभा॑गा हि पि॒तरः॑ ॥ ब्र॒ह्मवा॑दि॒नो वद॑न्ति ।
प्रा॒श्यां(३)न प्रा॒श्या(३)मि॑ति । यत् प्रा॒श्जी॑यात् । ज॒न्यम॒न्नम॑द्यात् ।
प्र॒मायु॑कः स्यात् । यन्न प्रा॒श्जी॑यात् । अ॒हविः॑ स्यात् । 70

TB 1.3.10.7

पि॒तृभ्य॑ आ॒वृश्च्ये॑त । अ॒वघ्ने॑यमे॒व । तन्ने॒व प्रा॑शितं॒ नेवाप्रा॑शितम् ॥
वी॒रं वा॑ वै पि॒तरः॑ प्र॒यन्तो॑ हर॒न्ति । वी॒रं वा॑ द॒दति॑ । द॒शां छि॑नन्ति ।
ह॒रण॑भागा हि पि॒तरः॑ । पि॒तृने॒व नि॒रव॑दयते ॥
उ॒त्तर॑ आ॒युषि॑ लो॒म छि॑न्दीत । पि॒तृणा॑ ह्ये॒तर्हि॑ ने॒दीयः॑ ॥ 71

TB 1.3.10.8

नम॑स्करोति । नम॑स्कारो हि पि॒तृणा॑म् ॥ नमो॑ वः पि॒तरो॑ र॒साय॑ ।
नमो॑ वः पि॒तरः॑ शु॒ष्माय॑ । नमो॑ वः पि॒तरो॑ जी॒वाय॑ ।
नमो॑ वः पि॒तरः॑ स्व॒धायै॑ ॥ नमो॑ वः पि॒तरो॑ म॒न्यवै॑ ।

नमो॑ वः॑ पि॒तरो॑ घो॒राय॑ । पि॒तरो॑ नमो॑ वः॑ ।

य ए॒तस्मिन्॑ लो॒के स्थ॑ । 72

TB 1.3.10.9

युष्मा॑ऽस्तेऽनु॑ । ये॑ऽस्मिन्॑ लो॒के । मां॑ ते॒ ऽनु॑ । य ए॒तस्मिन्॑ लो॒के स्थ॑ ।

यूयं॑ तेषां॑ वसि॒ष्ठो भू॒यास्त॑ । ये॑ऽस्मिन्॑ लो॒के ।

अ॒हं तेषां॑ वसि॒ष्ठो भू॒यास॑मि॒त्याह॑ । वसि॒ष्ठः स॒माना॑नां॑ भवति॑ ।

य ए॒वं वि॒द्वान्-पि॒तृभ्यः॑ क॒रोति॑ ॥

ए॒ष वै म॑नु॒ष्याणां॑ य॒ज्ञः । 73

TB 1.3.10.10

दे॒वानां॑ वा इ॒तरे॑ य॒ज्ञाः । ते॒न वा ए॒तत् पि॒तृलो॒के च॑रति॑ ॥

यत् पि॒तृभ्यः॑ क॒रोति॑ । स ई॒श्वरः॑ प्र॒मेतोः॑ । प्रा॒जाप॒त्यय॑र्चा पुन॒रैति॑ ।

य॒ज्ञो वै प्र॒जाप॑तिः । य॒ज्ञेनै॒व स॒ह पुन॒रैति॑ । न प्र॒मायु॑को भवति॑ ॥

पि॒तृलो॒के वा ए॒तद्-य॑ज॒मानश्च॑रति॑ । यत् पि॒तृभ्यः॑ क॒रोति॑ () ।

स ई॒श्वर आ॒र्तिमा॒र्तोः॑ । प्र॒जाप॑ति-स्त्वावै॒नं त॒त उ॒न्नेतु॑मर्ह॒तीत्याहुः॑ ।

यत् प्रा॒जाप॒त्यय॑र्चा पुन॒रैति॑ । प्र॒जाप॑तिरे॒वैनं॑ त॒त उ॒न्नय॑ति ।

ना॒र्तिमा॒र्च्छति॑ य॒ज॒मानः॑ ॥ 74

(इत्य - जनुते - पद्यन्ते - पद्यन्ते षड्वा ऋतवो - वर्ततेऽ - हविः
स्यान् - नेदीयः - स्थ - यज्ञो - यजमानश्चरति यत् पितृभ्यः
करोति पञ्च च)

17 वैश्वदेवेन वै प्रजापतिः

T.B.1.6.8.1

वैश्वदेवेन वै प्रजापतिः प्रजा असृजत ।
ता वरुणप्रघासैर्-वरुणपाशादमुञ्चत् । साकमेधैः प्रत्यस्थापयत् ।
त्र्यम्बकै रुद्रं निरवादयत । पितृयज्ञेन सुवर्गं लोकमगमयत् ।
यद्-वैश्वदेवेन यजते । प्रजा एव तद्-यजमानः सृजते ।
ता वरुणप्रघासैर्-वरुणपाशान्-मुञ्चति ।
साकमेधैः प्रतिष्ठापयति । त्र्यम्बकै रुद्रं निरवदयते । 75

T.B.1.6.8.2

पितृयज्ञेन सुवर्गं लोकं गमयति । दक्षिणतः प्राचीनावीती निर्वपति ।
दक्षिणावृद्धि पितृणाम् । अनादृत्य तत् । उत्तरत एवोपवीय निर्वपेत् ।
उभये हि देवाश्च पितरश्चेज्यन्ते । अथो यदेव दक्षिणार्द्धेऽधिश्चयति ।

तेन दक्षिणावृत् । सोमाय पितृमते पुरोडाशं षट्कपालं निर्वपति ।

सम्वत्सरो वै सोमः पितृमान् । 76

T.B.1.6.8.3

सम्वत्सरमेव प्रीणाति । पितृभ्यो बर्हिषद्भ्यो धानाः ।

मासा वै पितरो बर्हिषदः । मासानेव प्रीणाति ।

यस्मिन् वा ऋतौ पुरुषः प्रमीयते । सोऽस्यामुष्मिन् लोके भवति ।

बहुरूपा धाना भवन्ति । अहोरात्राणा-मभिजित्यै ।

पितृभ्यो ऽग्निष्वात्तेभ्यो मन्थम् ।

अर्द्धमासा वै पितरोऽग्निष्वात्ताः । 77

T.B.1.6.8.4

अर्द्धमासानेव प्रीणाति । अभिवान्यायै दुग्धे भवति ।

सा हि पितृदेवत्यं दुहे । यत् पूर्णम् । तन् मनुष्याणाम् ।

उपर्यर्द्धो देवानाम् । अर्द्धः पितृणाम् । अर्द्ध उपमन्थति ।

अर्द्धो हि पितृणाम् । एकयोपमन्थति । 78

T.B.1.6.8.5

एका हि पितृणाम् । दक्षिणोपमन्थति । दक्षिणावृद्धि पितृणाम् ।

अनारभ्योपमन्थति । तद्धि पितृन्-गच्छति ।

इ॒मां दि॒शं वे॑दि॒मु॒द्ध॒न्ति ।

उ॒भये॒ हि दे॒वाश्च॑ पि॒तरश्चे॒ज्यन्ते॑ ॥ चतुः॑ स्र॒क्तिर्भ॑वति ।

सर्वा॑ ह्यनु॒ दिशः॑ पि॒तरः॑ । अ॒खा॒ता भ॑वति । 79

T.B.1.6.8.6

खा॒ता हि दे॒वाना॑म् । म॒द्ध्यतो॑ ऽग्नि॒राधी॑यते ।

अ॒न्ततो॑ हि दे॒वाना॑-माधी॒यते॑ ॥

वर्षी॑यानि॒द्धम॑ इ॒द्धमाद्-भ॑वति॒ व्यावृ॑त्त्यै ।

परि॑श्रयति । अ॒न्तर्हि॒तो हि पि॑तृ॒लोको॑ म॒नुष्य॑लो॒कात् ।

यत्-परु॑षि दि॒नम् । तद्-दे॒वाना॑म् ।

यद॑न्तरा । तन्-म॒नुष्या॑णाम् । 80

T.B.1.6.8.7

यथ्॑ स॒मूल॑म् । तत् पि॑तृ॒णाम् । स॒मूलं ब॒र्हिर्-भ॑वति॒ व्यावृ॑त्त्यै ।

दक्षि॑णा स्तृ॒णाति॑ । दक्षि॑णावृ॒द्धि पि॑तृ॒णाम् । त्रिः॑ पर्येति ।

तृती॑ये वा इ॒तो लो॒के पि॒तरः॑ । ता॒ने॒व प्री॑णाति ।

त्रिः पुनः॑ पर्येति । षट्थ॑संप॒द्यन्ते॑ । 81

T.B.1.6.8.8

षड्वा ऋ॒तवः॑ । ऋ॒तू॒ने॒व प्री॑णाति । यत् प्र॒स्तरं॑ य॒जुषा॑ गृ॒ह्णी॒यात् ।
 प्र॒मायु॑को यज॒मानः॑ स्यात् । यन्न गृ॒ह्णी॒यात् । अ॒नाय॑तनः स्यात् ।
 तू॒ष्णीमे॒व न्य॑स्येत् । न प्र॒मायु॑को भवति । ना॒नाय॑तनः ।
 यत्-त्रीन्-परि॒धीन् परि॑द॒ध्यात् । 82

T.B.1.6.8.9

मृ॒त्युना॑ यज॒मानं॑ परि॒गृ॒ह्णी॒यात् । यन्न परि॑-द॒ध्यात् ।
 रक्षा॑सि य॒ज्ञं ह॑न्युः । द्वौ परि॒धी परि॑दधाति । रक्ष॑सा-मप॒हत्यै॑ ।
 अथो मृ॒त्योरे॒व यज॑मान-मु॒त्सृ॑जति ।
 यत् त्री॑णि त्री॒णि ह॒वीं॒ष्युदा॑हरेयुः । त्रय॑स्त्रय एषां॑ सा॒कं प्र॑मीयेरन् ।
 एकै॑क-म॒नूची॑ना-न्यु॒दाह॑रन्ति ।
 एकै॑क ए॒वैषा॑म॒न्वञ्चः॑ प्र॑मीयते () । क॒शिपु॑ कशि॒पव्या॑य ।
 उ॒प॒ब॒र्ह॒ण-मु॒प॒ब॒र्ह॒ण्या॑य । आ॒ञ्ज॒न-मा॒ञ्ज॒न्या॑य ।
 अ॒भ्य॒ञ्ज॒न-म॒भ्य॒ञ्ज॒न्या॑य । यथा॒भा॒गमे॒वैनान्॑ प्रीणाति ॥ 83

(नि॒र॒व॒द॒य॒ते - पि॒तृ॒मा - न॒ग्नि॒ष्वा॒त्ता - ए॒क॒यो॒प॒ म॒न्थ - त्य॒खा॒ता
 भ॒व॒ति-म॒नु॒ष्या॑णां - प॒द्य॒न्ते - परि॑द॒ध्यान् - मी॑य॒ते प॒ञ्च च॑)
 (A8)

18 अग्नये देवेभ्यः

T.B.1.6.9.1

अ॒ग्नये॑ दे॒वेभ्यः॑ पि॒तृभ्यः॑ समि॒द्ध्यमा॑ना॒यानु॑ब्रू॒हीत्या॑ह ।
उ॒भये॑ हि दे॒वाश्च॑ पि॒तरश्चे॒ज्यन्ते॑ ॥ ए॒काम॒न्वाह॑ । ए॒का हि॑ पि॒तृणा॑म् ।
त्रि॒रन्वा॑ह । त्रि॒र्हि दे॒वाना॑म् । आ॒घारा॑वा॒घार॑यति ।
य॒ज्ञ प॒रुषो॑र॒नन्तरि॑त्यै । ना॒र्षेयं॑ वृ॒णीते॑ । न हो॒तार॑म् । 84

T.B.1.6.9.2

यदा॒र्षेयं॑ वृ॒णीत॑ । यद्धो॒तार॑म् । प्र॒मायु॑को यज॒मानः॑ स्यात् ।
प्र॒मायु॑को हो॒ता ॥ तस्मा॑न्न वृ॒णीते॑ । यज॒मानस्य॑ हो॒तुर्-गो॒पीथा॑य ।
अप॑र्ब॒र्हिषः॑ प्र॒याजान्॑ यजति । प्र॒जा वै ब॒र्हिः ।
प्र॒जा ए॒व मृ॒त्यो॒रुत्सृ॑जति । आ॒ज्यभा॑गौ यजति । 85

T.B.1.6.9.3

य॒ज्ञस्यै॒व चक्षु॑षी॒ नान्तरि॑ति । प्रा॒चीना॒वीती॒ सोमं॑ यजति ।
पि॒तृदे॒वत्या॑ हि । ए॒षा ऽऽहु॑तिः । पञ्च॑कृ॒त्वोऽव॑द्यति ।
पञ्च॑ हो॒ता दे॒वताः॑ । द्वे पु॒रोऽनु॑वा॒क्ये॑ । या॒ज्या दे॒वता॑ वषट्का॒रः ।
ता ए॒व प्री॑णाति । स॒न्तत॑म॒वद्य॑ति । 86

T.B.1.6.9.4

ऋ॒तूना॑ सं॒तत्यै॑ । प्रै॒वैभ्यः॑ पूर्॒वया॑ पु॒रोनु॒वाक्य॑या ऽऽह ।
 प्र॒णय॑ति द्वि॒तीय॑या । ग॒मय॑ति या॒ज्यया॑ । तृ॒तीये॑ वा इ॒तो लो॒के पि॒तरः॑ ।
 अ॒ह ए॒वैनान्॑ पूर्॒वया॑ पु॒रोनु॒वाक्य॑या ऽत्या॒नय॑ति । रा॒त्रियै॑ द्वि॒तीय॑या ।
 ऐ॒वैनान्॑ या॒ज्यया॑ ग॒मय॑ति । द॒क्षिण॑तो॒ऽवदा॑य ।
 उ॒दङ्मु॒तिक्राम॑ति व्यावृ॒त्यै । 87

T.B.1.6.9.5

आ स्व॒धेत्या॑श्रावयति । अस्तु स्व॒धेति॑ प्र॒त्याश्रा॑वयति ।
 स्व॒धा नम॑ इति वषट्करोति । स्व॒धाका॒रो हि पि॒तृणा॑म् ।
 सोम॑म॒ग्रे य॑जति । सोम॑प्रयाजा हि पि॒तरः॑ । सोमं॑ पि॒तृम॑न्तं य॒जति॑ ।
 स॒म्व॑त्सरो वै सोमः॑ पि॒तृमा॑न् । स॒म्व॑त्सरमे॒व तद्-य॑जति ।
 पि॒तृन्-ब॑र्हिषदो यजति । 88

T.B.1.6.9.6

ये वै यज्वानः॑ । ते पि॒तरो॑ ब॒र्हिष॑दः । ताने॒व तद्-य॑जति ।
 पि॒तृन्ग॑निष्वा॒त्तान् य॑जति । ये वा अ॒यज्वानो॑ गृ॒हमे॒धिनः॑ ।
 ते पि॒तरो॑ऽग्निष्वा॒त्ताः । ताने॒व तद्-य॑जति ।

अ॒ग्निं क॒व्य॒वा॒हनं॑ ँ॒य॒जति॑ ।

य ए॒व पि॒त॒ृणा॒म॒ग्निः॑ । तमे॒व तद्-य॑जति । 89

T.B.1.6.9.7

अथो॒ यथा॒ऽग्नि॑ स्वि॒ष्ट॒कृतं॑ ँ॒य॒जति॑ । ता॒दृ॒गे॒व तत् ।

ए॒त॒त्ते॒ त॒त॒ ये च॒ त्वा॒म॒न्वि॒ति॒ ति॒सृ॒षु स्र॒क्ती॒षु नि॒द॒धा॒ति॑ ।

तस्मा॒दा॒तृ॒तीया॒त् पु॒रु॒षा॒न्ना॒म न॑ गृह्णन्ति । ए॒ता॒व॒न्तो॒ ही॒ज्यन्ते॑ ॥

अ॒त्र पि॒त॒रो यथा॒भा॒गं म॒न्द॒ध्व॒मि॒त्या॒ह । ह्री॒का हि पि॒त॒रः॑ ।

उ॒द॒ञ्चो॒ निष्क्रा॑मन्ति । ए॒षा वै म॒नु॒ष्या॒णां दिक् ।

स्वा॒मे॒व तद्-दि॒श॒म॒नु निष्क्रा॑मन्ति । 90

T.B.1.6.9.8

आ॒ह॒व॒नीय॒-मु॒प॒ति॒ष्ठन्ते॑ । न्ये॒वा॒स्मै तद्ध॑नुवते । यथ्स॒त्या॒ह॒व॒नीये॑ ॥

अथा॒न्यत्र॑ चरन्ति । आ॒त॒मि॒तो॒रु॒प॒ति॒ष्ठन्ते॑ । अ॒ग्नि॒मे॒वो॒प॒द्र॒ष्टारं॑ कृ॒त्वा ।

पि॒त॒ृन्-नि॒र॒व॒द॒यन्ते॑ । अ॒न्तं वा॑ ए॒ते प्रा॒णा॒नां ग॒च्छन्ति॑ ॥

य आ॒त॒मि॒तो॒रु॒प॒ति॒ष्ठन्ते॑ । सु॒स॒न्दृ॒शं त्वा व॒य॒मि॒त्या॒ह । 91

T.B.1.6.9.9

प्रा॒णो वै सु॒स॒न्दृ॒क् । प्रा॒ण॒मे॒वा॒त्मन्-द॑धते ।

यो॒जा न्वि॒न्द्र ते ह॒री इ॒त्या॒ह । प्रा॒ण॒मे॒व पु॒न॒र॒यु॒क्त ।

अक्ष॒न्नमी॑मद॒न्त॒ हीति॒ गार्.ह॑पत्य॒-मु॒पति॑ष्ठन्ते ।

अक्ष॒न्नमी॑मद॒न्ताथ॒ त्वो॑पति॒ष्ठाम॒ह॒ इति॒ वावै॑तदाह ।

अमी॑मद॒न्त॒ पि॒तरः॒ सो॒म्या इत्य॑भि प्रपद्यन्ते ।

अमी॑मद॒न्त॒ पि॒तरोऽथ॒ त्वाऽभि॑ प्रपद्याम॒ह॒ इति॒ वावै॑तदाह ।

अपः॑ परि॒षिञ्च॑ति । मा॒र्जय॑त्ये॒वैनान्॑ । 92

T.B.1.6.9.10

अथो॑ त॒र्पय॑त्ये॒व । तृ॒प्यति॑ प्र॒जया॑ प॒शुभिः॑ । य॒ एवं॑ वै॒द ।

अप॑ बर्.हिषावनूयाजौ यजति । प्र॒जा वै बर्.हिः॑ ।

प्र॒जा ए॒व मृ॒त्यो॒रुथ्सृ॑जति । च॒तुरः॑ प्रया॒जान्. य॑जति । द्वा॒वनू॑याजौ ।

षट्थ॑संपद्यन्ते । षड्वा ऋ॒तवः॑ () । 93

T.B.1.6.9.11

ऋ॒तू॒ने॒व प्री॑णाति । न प॒त्यन्वा॑स्ते ॥

न स॒म्य॑जयन्ति । यत्प॒त्यन्वा॑सीत ।

यत्स॒म्य॑जयेयुः । प्र॒मायु॑का स्यात् ।

तस्मा॑न्ना॒न्वास्ते॑ ॥ न स॒म्य॑जयन्ति ।

प॒त्नियै॑ गोपी॒थाय॑ ॥ 94

(हो॒ता॒र – मा॒ज्य॒भा॒गौ यज॑ति – स॒न्त॒त॒म॒व॒द्य॒ति – व्या॒वृ॒त्त्यै –
ब॒र्हि॒षदो॑ यज॑ति – त॒मे॒व तद् य॑ज – त॒य॒नु नि॒ष्क्रा॑म॒न्त्या – है –
ना॒न् – ऋ॒त॒वो – +न॒व च॑) (A9)

19 उ॒श॒न्त॒स्त्वा ह॒वाम॑ह

T.B.2.6.16.1

उ॒श॒न्त॒स्त्वा ह॒वाम॑ह आ नो॑ अ॒ग्ने सु॒के॒तु॒ना ॥
त्व॒ः सो॒म म॒हे भ॒गं त्व॒ः सो॒म प्र॒चि॒कितो॑ म॒नी॒षा ।
त्व॒या हि नः॑ पि॒तरः॑ सो॒म पूर्वे॑ त्व॒ः सो॒म पि॒तृ॒भिः
स॒म॒वि॒दानः॑ ।
ब॒र्हि॒षदः॑ पि॒तर आ॒ऽहं पि॒तृन् ।
उ॒प॒हू॒ताः पि॒तरो॑ ऽग्नि॒ष्वा॒त्ताः पि॒तरः॑ ॥
अ॒ग्नि॒ष्वा॒त्ता॒नृ॒तु॒म॒तो ह॒वाम॑हे । न॒रा॒श॒ः सो॒मपी॒थं य॑ आ॒शुः ।
ते नो॑ अ॒र्व॒न्तः सु॒ह॒वा भ॑वन्तु । शं नो॑ भ॑वन्तु द्वि॒प॒दे शं च॑तु॒ष्प॒दे ॥
ये अ॒ग्नि॒ष्वा॒त्ता ये॒ऽन॒ग्नि॒ष्वा॒त्ताः । 95

T.B.2.6.16.2

अ॒हो॒मु॒चः॑ पि॒तरः॑ सो॒म्यासः॑ । पे॒रेऽव॑रेऽमृ॒तासो॑ भव॒न्तः॑ ।
अधि॑ब्रुवन्तु ते अ॒वन्त्व॑स्मान् ॥ वा॒न्यायै॑ दु॒ग्धे जु॑षमाणाः क॒रम्भ॑म् ।
उ॒दी॒राणा॑ अ॒वरे॑ पे॒रे च॑ । अ॒ग्नि॒ष्वा॒त्ता ऋ॒तुभिः॑ स॒म्वि॑दा॒नाः॑ ।
इन्द्र॑वन्तो ह॒विरि॒दं जु॑षन्ताम् ॥
यद॑ग्ने क॒व्यवा॑हन॒ त्वम॑ग्न ई॒डितो॑ जा॒तवे॑दः ।
मा॒त॒ली क॒व्यैः॑ ॥ ये ता॑तृ॒पुर्दे॑व॒त्रा जे॑ह॒मानाः॑ () ।
हो॒त्रावृ॑धः स्तो॒म॒त॒ष्टासो॑ अ॒र्कैः॑ । आ॒ग्ने या॑हि सु॒वि॒द॒त्रेभि॑र॒वाङ् ।
स॒त्यैः क॒व्यैः पि॒तृभि॑र्-घ॒र्म॒सद्भिः॑ ॥ ह॒व्यवा॑ह॒म॒जरं॑ पु॒रुप्रि॑यम् ।
अ॒ग्निं घृ॑तेन ह॒विषा॑ स॒पर्य॑न् । उपा॑स॒दं क॒व्यवा॑हं पि॒तृणा॑म् ।
स नः॑ प्र॒जां वी॑र॒वती॑ ॥ स॒मृण्व॑तु ॥ 96
(अ॒न॒ग्नि॒ष्वा॒त्ता – जे॑ह॒मानाः॑ स॒प्त च॑)

त्रीणाचीकेतं

20 अयं वाव यः

T.B.3.11.7.1

अयं वाव यः पवते । सौ॒ऽग्नि॑ न॒चिके॑तः । स यत् प्राङ् पवते ।
तदस्य॑ शिरः । अथ॒ यद् दक्षि॑णा । स दक्षि॑णः पक्षः ।
अथ॒ यत् प्रत्यक् । तत् पुच्छं॑ ॥ य दुदङ्ङ् । स उत्तरः॑ पक्षः । 97

T.B.3.11.7.2

अथ॒ यथ् स॒म्व॑ति । तदस्य॑ स॒मञ्च॑नं च प्रसार॑णं च ।
अथो॑ संपदे॒वास्य॑ सा ॥ स॒ ह वा अ॑स्मै स कामः॑ पद्यते ।
यत् कामो॑ यज॒ते । यो॒ऽग्निं॑ न॒चिके॑तं चिनु॒ते ।
य उ॑ चैन॒मेवं॑ वेद ॥ यो ह॒ वा अ॒ग्ने न॒चिके॑तस्याय॒तनं॑
प्रति॑ष्ठां वेद । आ॒यत॑नवान् भवति । गच्छ॑ति प्रति॑ष्ठां । 98

T.B.3.11.7.3

हिर॑ण्यं वा अ॒ग्ने न॒चिके॑तस्याय॒तनं॑ प्रति॑ष्ठा । य ए॒वं वेद॑ ।
आ॒यत॑नवान् भवति । गच्छ॑ति प्रति॑ष्ठां ॥
यो ह॒ वा अ॒ग्ने न॒चिके॑तस्य शरी॑रं वेद ।
स शरी॑र ए॒व स्वर्गं॑ लो॒कमे॑ति ।

हिरण्यं॑ वा॒ अ॒ग्ने॒ न॒चिके॒तस्य॑ शरी॒रं ।
य॒ एवं॑ वे॒द । स॒ शरी॑र ए॒व स्व॒र्गं लो॒कमे॑ति ॥
अथो॒ यथा॑ रु॒क्म उ॒त्-त॒प्तो भा॒य्यात् । 99

T.B.3.11.7.4

ए॒वमे॒व स॒ तेज॑सा॒ यश॑सा । अ॒स्मिञ्च॑ लो॒के-ऽमु॑ष्मिञ्च॑ भा॒ति ॥
उ॒रवो॑ ह॒ वै ना॒मैते॑ लो॒काः । ये-ऽव॑रेणादि॒त्यं ।
अथ॑ है॒ते व॑रीयाञ्सो लो॒काः । ये प॑रेणादि॒त्यं ।
अ॒न्तव॑न्तञ् ह॒ वा ए॒ष क्ष॒य्यं लो॒कं ज॑यति । यो-ऽव॑रेणादि॒त्यं ।
अथ॑ है॒षो-ऽन॑न्त-म॒पार-म॑क्ष॒य्यं लो॒कं ज॑यति ।
यः प॑रेणादि॒त्यं () ॥ 100

T.B.3.11.7.5

अ॒नन्त॑ञ् ह॒ वा अ॒पार-म॑क्ष॒य्यं लो॒कं ज॑यति ।
योऽग्निं॑ न॒चिके॒तं चि॒नुते॑ । य उ॒ चैन॑-मे॒वं वे॒द ॥
अथो॒ यथा॑ रथे॒ तिष्ठ॑न् पक्ष॒सी पर्या॑-व॒र्तमा॑ने प्र॒त्यपे॑क्षते ।
ए॒व-म॑हो॒रात्रे॑ प्र॒त्यपे॑क्षते ।

नास्या-होरात्रे लोकमाप्नुतः । योऽग्निं नाचिकेतं चिनुते ।

य उ चैन-मेवं वैद ॥ 101

(उत्तरः पक्षो - गच्छति प्रतिष्ठां - भाय्याद् - यः परेणादित्य
-मष्टौ च)

21 उशन् ह वै

T.B.3.11.8.1

उशन्. ह वै वाजश्चवसः सर्ववेदसं ददौ ।

तस्य ह नचिकेता नाम पुत्र आस । तं ह कुमारं सन्तं ।

दक्षिणासु नीयमानासु श्रद्धा ऽऽविवेश । स होवाच ।

तत कस्मै मां दास्यसीति । द्वितीयं तृतीयं ॥ तं ह परीत उवाच ।

मृत्यवे त्वा ददामीति ॥ तं ह स्मोत्थितं वागभिवदति । 102

T.B.3.11.8.2

गौतम कुमारमिति । स होवाच । परेहि मृत्यो गृहान् ।

मृत्यवे वै त्वाऽदा-मिति ॥ तं वै प्रवसन्तं गन्तासीति होवाच ।

तस्य स्म तिस्रो रात्री-रनाश्वान् गृहे वसतात् । स यदि त्वा पृच्छेत् ।

कु॒मा॒र॒ क॒ति॒ रा॒त्री-र॒वा॒थ्सी-रि॒ति॒ । ति॒स्र॒ इति॒ प्र॒ति ब्रू॒तात् ।

किं प्र॒थ॒माँ रा॒त्रि-मा॒रु॒ना इति॑ । 103

T.B.3.11.8.3

प्र॒जां त॒ इति॑ । किं द्वि॒तीया-मि॒ति॑ । प॒शूँस्त॒ इति॑ ।

किं तृ॒तीया-मि॒ति॑ । सा॒धुकृ॒त्यां त॒ इति॑ ॥ तं वै प्र॒व॒स॒न्तं ज॒गाम॑ ।

तस्य॑ ह ति॒स्रो रा॒त्री-र॒नाश्वा॒न् गृ॒ह उ॒वास॑ । त॒मा॒ग॒त्य॑ प॒प्र॒च्छ॑ ।

कु॒मा॒र॒ क॒ति॒ रा॒त्री-र॒वा॒थ्सी-रि॒ति॒ । ति॒स्र॒ इति॒ प्र॒त्यु॒वाच॑ । 104

T.B.3.11.8.4

किं प्र॒थ॒माँ रा॒त्रि-मा॒रु॒ना इति॑ । प्र॒जां त॒ इति॑ ।

किं द्वि॒तीया-मि॒ति॑ । प॒शूँस्त॒ इति॑ । किं तृ॒तीया-मि॒ति॑ ।

सा॒धुकृ॒त्यां त॒ इति॑ ॥ न॒म॒स्ते अ॒स्तु भ॒गव॑ इति॑ हो॒वाच॑ ।

वरं॑ वृ॒णी॒ष्वेति॑ ॥ पि॒तर॑मे॒व जी॒वन्न॑या॒नीति॑ ॥

द्वि॒तीयं॑ वृ॒णी॒ष्वेति॑ । 105

T.B.3.11.8.5

इ॒ष्टा॒पूर्त॑यो मे॒ ऽक्षि॑तिं ब्रू॒हीति॑ हो॒वाच॑ ।

तस्मै॑ है॒तम॑ग्निं ना॒चिके॑त-मु॒वाच॑ ।

ततो॑ वै तस्यै-॒ष्टा॒पूर्ते॑ ना क्षी॒येते॑ ॥

नास्येष्टा-पूर्ते क्षीयेते । योऽग्निं नाचिकेतं चिनुते ।

य उ चैन-मेवं वेद ॥ तृतीयं वृणीष्वेति ।

पुन मृत्यो मे ऽपजितिं ब्रूहीति होवाच ।

तस्मै हैतमग्निं नाचिकेत-मुवाच ।

ततो वै सोऽप पुन मृत्यु-मजयत् । 106

T.B.3.11.8.6

अप पुन मृत्युं जयति । योऽग्निं नाचिकेतं चिनुते ॥

य उ चैन-मेवं वेद ॥ प्रजापति र्वे प्रजाकाम-स्तपो-ऽतप्यत ।

स हिरण्य-मुदास्यत् । त-दग्नौ प्रास्यत् । त-दस्मै नाच्छदयत् ।

तद् द्वितीयं प्रास्यत् । त-दस्मै नै वाच्छदयत् ।

तत् तृतीयं प्रास्यत् । 107

T.B.3.11.8.7

त-दस्मै नै वाच्छदयत् ।

त-दात्म-न्नेव हृदय्येऽग्नौ वैश्वानरे प्रास्यत् ।

त-दस्मा अच्छदयत् । तस्माद्धिरण्यं कनिष्ठं धनानां ।

भुञ्जत् प्रियतमं । हृदयजं हि । स वै तमेव नाविन्दत् ।

यस्मै॑ तां॑ दक्षि॒णा-म॑नेष्यत् ।

ता॒ञ् स्वा॒यै॒व ह॑स्ताय॒ दक्षि॑णायानयत् ।

तां॑ प्रत्य॒गृह्णा॑त् । 108

T.B.3.11.8.8

दक्षाय॑ त्वा॒ दक्षि॑णां॒ प्रति॑गृह्णामीति॑ । सो॑ ऽदक्ष॒त दक्षि॑णां॒ प्रति॑गृह्य ।

दक्ष॑ते ह॒ वै दक्षि॑णां॒ प्रति॑गृह्य । य॒ एवं॑ वे॒द ॥

ए॒तद्ध॑ स्म॒ वै तद् वि॒द्वाञ् सो॑ वाज॒श्रव॑सा गो॒तमाः॑ ।

अ॒प्यनू॑दे॒श्यां दक्षि॑णां॒ प्रति॑गृह्णन्ति ।

उ॒भये॑न॒ वयं॑ दक्षि॒ष्याम॑ह ए॒व दक्षि॑णां॒ प्रति॑गृह्येति॑ ।

ते॒ ऽदक्ष॑न्त॒ दक्षि॑णां॒ प्रति॑गृह्य ।

दक्ष॑ते ह॒ वै दक्षि॑णां॒ प्रति॑गृह्य । य॒ एवं॑ वे॒द () ।

प्र॒ हा॒न्यं व्ली॑नाति ॥ 109

(व॒द - त्या॒श॒ना इ - त्पु॒वाच - द्वि॒तीयं॑ वृ॒णीष्वे - त्य॒जय॑त् -

तृ॒तीयं॑ प्रा॒स्यत् - गृह्णा॑द् - य॒ एवं॑ वे॒दैकं॑ च)

22 त॒ हैतमेके

T.B.3.11.9.1

त॒ हैत-मेके॑ प॒शुबन्ध॑ ए॒वोत्तर॑वे॒द्यां चि॑न्वते ।
 उ॒त्तर॑वे॒दिस॑म्मित ए॒षोऽग्नि॑रिति॒ वद॑न्तः ।
 तन्न॑ त॒था कु॑र्यात् । ए॒त-म॒ग्निं का॑मे॒न व्य॑र्द्धयेत् ।
 स ए॒नं का॑मे॒न व्य॑र्द्धः । का॑मे॒न व्य॑र्द्धयेत् ।
 सौ॒म्ये वा॑वैन॒मध्व॑रे चि॒न्वीत॑ । य॒त्र वा॑ भू॒यिष्ठा॑ आ॒हु॒तयो॑ हू॒येर॑न् ।
 ए॒त-म॒ग्निं का॑मे॒न स॑म॒र्द्धय॑ति । स ए॒नं का॑मे॒न स॑म॒र्द्धः । 110

T.B.3.11.9.2

का॑मे॒न स॑म॒र्द्धय॑ति ॥ अथ॑ है॒नं पु॒रर्ष॑यः ।
 उ॒त्तर॑वे॒द्या-मे॒व स॒त्रिय॑-मचि॒न्वत॑ । ततो॑ वै तेऽवि॒न्दन्त॑ प्र॒जां ।
 अ॒भि स्व॑र्गं लो॒क-म॑जयन् । वि॒न्दत॑ ए॒व प्र॒जां ।
 अ॒भि स्व॑र्गं लो॒कं ज॑यति । योऽग्निं॑ नाचि॒केतं॑ चि॒नुते॑ ।
 य उ॑ चैन-मे॒वं वे॑द ॥ अथ॑ है॒नं वा॒युर् ऋ॑द्धि॒कामः॑ । 111

T.B.3.11.9.3

य॒थान्यु॑प्त-मे॒वोप॑दधे । ततो॑ वै स ए॒ता-मृ॑द्धि-मा॒र्द्ध॒नोत्॑ ।
 या॒मिदं॑ वा॒युर् ऋ॑द्धः । ए॒ता-मृ॑द्धि-मृ॒द्ध॒नोति॑ ।

यामिदं वा॒युर् ऋ॒द्धः । योऽग्निं॑ नाचि॒केतं॑ चिनु॒ते ।
य उ॑ चैन-मे॒वं वे॒द ॥ अथ॑ है॒नं गो॒ब॒लो वा॒र्ष्णः प॒शु॒का॒मः ।
पा॒क्तमे॒व चि॒क्ये । पञ्च॑ पु॒रस्ता॑त् । 112

T.B.3.11.9.4

पञ्च॑ दक्षि॒णतः॑ । पञ्च॑ प॒श्चात् । पञ्चो॑त्तर॒तः । एकां॑ म॒द्ध्यै॑ ।
ततो॑ वै स स॒हस्रं॑ प॒शून् प्रा॒प्नो॑त् । प्र स॒हस्रं॑ प॒शू-ना॒प्नो॑ति ।
योऽग्निं॑ नाचि॒केतं॑ चिनु॒ते । य उ॑ चैन-मे॒वं वे॒द ॥
अथ॑ है॒नं प्र॒जाप॑ति ज्यै॒ष्ठ्य॒का॒मो यश॑स्का॒मः प्र॒जन॑न॒का॒मः ।
त्रि॒वृ॒तमे॒व चि॒क्ये । 113

T.B.3.11.9.5

स॒प्त पु॒रस्ता॑त् । ति॒स्रो दक्षि॒णतः॑ । स॒प्त प॒श्चात् । ति॒स्र उत्तर॑तः ।
एकां॑ म॒द्ध्यै॑ । ततो॑ वै स प्र यशो॑ ज्यै॒ष्ठ्य-मा॒प्नो॑त् ।
ए॒तां प्र॒जातिं॑ प्रा॒जाय॑त । या॒मिदं॑ प्र॒जाः प्र॒जाय॑न्ते ।
त्रि॒वृ॒द् वै ज्यै॒ष्ठ्यं । मा॒ता पि॒ता पु॒त्रः । 114

T.B.3.11.9.6

त्रि॒वृ॒त् प्र॒जन॑नं । उ॒प॒स्थो यो॒नि र्म॑द्ध्य॒मा ।
प्रय॑शो ज्यै॒ष्ठ्य-मा॒प्नो॑ति । ए॒तां प्र॒जातिं॑ प्र॒जाय॑ते ।

यामिदं प्रजाः प्रजायन्ते । योऽग्निं नाचिकेतं चिनुते ।
य उ चैनमेवं वेद ॥ अथ हैन-मिन्द्रो ज्यैष्ठ्यकामः ।
ऊर्ध्वा एवोपदधे । ततो वै स ज्यैष्ठ्य-मगच्छत् । 115

T.B.3.11.9.7

ज्यैष्ठ्यं गच्छति । योऽग्निं नाचिकेतं चिनुते ।
य उ चैन-मेवं वेद ॥ अथ हैन-मसावादित्यः स्वर्गकामः ।
प्राचीरेवोपदधे । ततो वै सोऽभि स्वर्गं लोक-मजयत् ।
अभि स्वर्गं लोकं जयति । योऽग्निं नाचिकेतं चिनुते ।
य उ चैन-मेवं वेद ॥ स यदीच्छेत् । 116

T.B.3.11.9.8

तेजस्वी यशस्वी ब्रह्मवर्चसी स्यामिति ।
प्राडाहोतुर्द्विष्या-दुथ्सर्पेत् । येयं प्रागाद् यशस्वती ।
सा मा प्रोर्णोतु । तेजसा यशसा ब्रह्मवर्चसेनेति ।
तेजस्यैव यशस्वी ब्रह्मवर्चसी भवति ॥ अथ यदीच्छेत् ।
भूयिष्ठं मे श्रद्दधीरन् । भूयिष्ठा दक्षिणा नयेयुरिति ।

दक्षिणासु नीयमानासु प्राच्येहि प्राच्येहीति प्राची जुषाणा वेत्वाज्यस्य
स्वाहेति सुवेणो-पहत्या हवनीये जुहुयात् । 117

T.B.3.11.9.9

भूयिष्ठ-मेवास्मै श्रद्धधते । भूयिष्ठा दक्षिणा नयन्ति ॥
पुरीष-मुपधाय । चिति-क्लृप्तिभि-रभिमृश्य ।
अग्निं प्रणीयोपसमाधाय । चतस्र एता आहुती जुहोति ।
त्वमग्ने रुद्र इति शतरुद्रीयस्य रूपं ।
अग्नाविष्णू इति वसोर्द्धारायाः । अन्नपत इत्यन्न होमः ।
सप्त ते अग्ने समिधः सप्त जिह्वा इति विश्वप्रीः () ॥ 118
(समृद्ध - ऋद्धिकामः - पुरस्तात् - चिक्ये - पुत्रो - ऽगच्छ -
दिच्छेत् - जुहुयात् - विश्वप्रीः)

Special Korvai

(पुरर्षयो वायुर् गोबलः सहस्रं प्रजापति स्त्रिवृदिन्द्रो
ऽसावादित्यः स यदीच्छेत्)

23 यां प्रथमामिष्टका

T.B.3.11.10.1

यां प्रथ॑मा-मिष्ट॑का-मुप॑दधाति । इ॒मं तया॑ लो॒क-म॒भिज॑यति ।
अथो॒ या अ॒स्मिन् ँलो॒के दे॒वताः॑ ॥
तासा॑ꣳ सायु॑ज्यꣳ सलो॒कता-मा॑प्नोति । यां द्वि॒तीया॑-मुप॑दधाति ।
अन्त॑रि॒क्षलो॒कं तया॑ऽभिज॑यति ।
अथो॒ या अन्त॑रि॒क्षलो॒के दे॒वताः॑ ॥
तासा॑ꣳ सायु॑ज्यꣳ सलो॒कता-मा॑प्नोति ।
यां तृ॒तीया॑-मुप॑दधाति ।
अमुं॑ तया॑ लो॒क-म॒भिज॑यति । 119

T.B.3.11.10.2

अथो॒ या अ॒मुष्मिन् ँलो॒के दे॒वताः॑ ।
तासा॑ꣳ सायु॑ज्यꣳ सलो॒कता-मा॑प्नोति ।
अथो॒ या अ॒मूरि॑तरा अ॒ष्टाद॑श ।
य ए॒वामी॑ उ॒रव॑श्च व॒रीयाꣳस॑श्च लो॒काः ।
ता॒नेव॑ ता॒भि-र॒भिज॑यति ॥

काम॒चारो॑ ह॒ वा अस्यो॑रुषु च वरीयस्सु च लोकेषु भवति ।

योऽग्निं॑ नाचिकेतं॑ चिनुते । य उ चैन-मेवं॑ वेद ॥

सम्॑वत्सरो वा अ॒ग्निर्नाचिके॑तः । तस्य॑ वसन्तः शिरः । 120

T.B.3.11.10.3

ग्री॒ष्मो दक्षि॑णः पक्षः । वर्॒षा उत्तरः॑ । शरत् पुच्छं॑ ।

मा॒साः कर्म॑का॒राः । अ॒हो॒रा॒त्रे शत॑रु॒द्गीयं॑ । पर्जन्यो॑ वसो॒र्द्धा॒रा॑ ।

यथा॒ वै पर्जन्यः॑ सुवृष्टं॑ वृष्ट्वा ।

प्रजा॑भ्यः सर्वान् कामान्त् संपूरयति ।

एव-मेव स तस्य॑ सर्वान् कामान्त् संपूरयति ।

योऽग्निं॑ नाचिकेतं॑ चिनुते । 121

T.B.3.11.10.4

य उ चैन-मेवं॑ वेद ॥ सम्॑वत्सरो वा अ॒ग्निर्नाचिके॑तः ।

तस्य॑ वसन्तः शिरः । ग्री॒ष्मो दक्षि॑णः पक्षः ।

वर्॒षाः पुच्छं॑ । शरदुत्तरः॑ पक्षः । हे॒मन्तो॑ मद्ध्यं॑ ।

पूर्व॑पक्षाश्चितयः । अपर॑पक्षाः पुरीषं । अ॒हो॒रा॒त्राणीष्ट॑काः () ।

एष॑ वाव सौ॒ग्नि-र॒ग्निमयः॑ पुनर्णवः ।

अ॒ग्नि॒मयो॑ ह॒ वै पु॒नर्ण॑वो भू॒त्वा । स्व॒र्गं लो॒क-मे॒ति ।

आ॒दि॒त्यस्य॑ सा॒युज्यं॑ । योऽ॒ग्निं ना॑चि॒केतं॑ चि॒नुते॑ ।

य उ॑ चैन-मे॒वं वे॒द ॥ 122

(अ॒मुं तया॑ लो॒कम॒भिज॑यति - शि॒रः - चि॒नुत - इ॒ष्टकाः॑ षट्च॑)

24 ऋचां प्राची

T.B.3.12.9.1

ऋ॒चां प्रा॒ची म॒हती॑ दि॒गुच्य॑ते । दक्षि॑णा-माहु॒ र्यजु॑षामपा॒रां ।

अथ॑र्वणा-म॒ण्डिर॑सां प्र॒तीची॑ । साम्ना॑-मु॒दीची॑ म॒हती॑ दि॒गुच्य॑ते ॥

ऋ॒ग्भिः पूर्वा॑ह्णे दि॒वि दे॒व ई॒यते॑ । य॒जुर्वे॒दे ति॑ष्ठति म॒ध्ये अ॒हः ।

सा॒मवे॒दे-ना॑स्तम॒ये म॒हीय॑ते । वे॒दै-र॒शून्य॑-स्त्रि॒भिरे॑ति सू॒र्यः ॥

ऋ॒ग्भ्यो जा॒ताः सर्व॑शो मूर्ति॑-माहुः ।

सर्वा॑ गति॑ र्याजु॒षी है॒व श॑श्चत् । 123

T.B.3.12.9.2

सर्वं॑ तेज॑ स्साम॒रूप्यं॑ ह॒ शश्च॑त् । सर्वं॑ हे॒दं ब्र॑ह्मणा है॒व सृ॑ष्टं ॥

ऋ॒ग्भ्यो जा॒तं वै॒श्यं वर्ण॑-माहुः । य॒जुर्वे॒दं क्ष॑त्रियस्या॒-हुर्यो॑निं ।

सा॒मवे॒दो ब्रा॑ह्म॒णानां॑ प्र॒सूतिः॑ । पूर्वे॑ पूर्वे॒भ्यो वच॑ ए॒त-दू॑चुः ॥

आ॒दर्श॒-म॒ग्निं चि॒न्वा॒नाः । पू॒र्वे वि॒श्व सृ॒जोऽमृ॒ताः ।
श॒तं वर्॒ष स॒हस्रा॒णि । दी॒क्षि॒ताः स॒त्र-मा॒सत ॥ 124

T.B.3.12.9.3

तप॑ आसीद् गृ॒हप॑तिः । ब्र॒ह्म ब्र॒ह्मा॑भवत् स्व॒यं ।
स॒त्यं ह॒ हो तैषा॑मासीत् । यद् वि॒श्वसृ॒ज आ॑सत ॥
अ॒मृत॑-मे॒भ्य उ॑दगायत् । स॒हस्रं॑ परि॒वथ्स॑रान् ।
भू॒तं ह॒ प्र॒स्तो तैषा॑मासीत् । भ॒विष्य॑त् प्र॒ति चा॑हरत् ॥
प्रा॒णो अ॑द्ध्व॒र्यु-र॑भवत् । इ॒दं स॑र्वं॒ सिषा॑सतां । 125

T.B.3.12.9.4

अ॒पा॒नो वि॒द्वा-ना॑वृतः । प्र॒ति प्रा॑तिष्ठ-द॒ध्वरे ॥
आ॒र्त॒वा उ॑पगा॒तारः॑ । स॒दस्या॑ ऋ॒तवो॑-ऽभ॒वन् ।
अ॒र्द्ध॒मा॒साश्च॑ मा॒साश्च॑ । च॒म॒सा-द॑ध्व॒र्यवो॑-ऽभ॒वन् ॥
अ॒शंस॑द् ब्र॒ह्मण॑-स्तेजः । अ॒च्छा॒वा॒को ऽभ॑वद् य॒शः ।
ऋ॒त-मे॑षां प्र॒शास्ता॑-ऽसीत् । यद् वि॒श्व सृ॒ज आ॑सत ॥ 126

T.B.3.12.9.5

ऊ॒र्ग-रा॒जा॒न-मु॑दवहत् । ध्रु॒वगो॑पः स॒हो-ऽभ॑वत् ।
ओ॒जो-ऽभ्य॑ष्टौद् ग्राव्.ण्णः । यद् वि॒श्व सृ॒ज आ॑सत ॥

अप॒चि॒तिः पो॒त्री॒या-म॒यज॒त् । ने॒ष्ट्री॒या-म॒यज॒त् त्वि॒षिः ।

आ॒ग्नी॒द्धा॒द् वि॒दुषी॑ स॒त्यं । श्र॒द्धा है॒वा य॑ज॒थ् स्व॒यं ॥

इ॒रा प॒त्नी वि॒श्व सृ॒जां । आ॒कू॒ति-र॒पि॒नडू॒विः । 127

T.B.3.12.9.6

इ॒ध्म॒ ह क्षु॒च् चै॒भ्य उ॒ग्रे । तृ॒ष्णा चा॑ व॒हता॒मु॒भे ॥

वा॒गेषा॑ सु॒ब्रह्म॒ण्या-ऽऽसी॒त् । छ॒न्दो॒यो॒गान् वि॒जान॑ती ।

क॒ल्प॒तन्त्रा॑णि त॒न्वा॒ना-ऽहः॑ । स॒॒स्थाश्च॑ स॒र्वशः॑ ॥

अ॒हो॒रा॒त्रे प॑शु॒पा॒ल्यौ । मु॒हूर्त्ताः प्रे॒ष्या अ॑भवन् ।

मृ॒त्युस्त॑द-भ॒व-द्धा॒ता । श॒मि॒तो ग्रो वि॒शां प॑तिः ॥ 128

T.B.3.12.9.7

वि॒श्वसृ॑जः प्रथ॒माः स॒त्र-मा॑सत । स॒हस्र॑स॒मं प्र॑सु॒तेन॑ य॒न्तः ।

ततो॑ ह ज॒ज्ञे भु॑वन॒स्य गो॒पाः । हि॒र॒ण्म॒यः श॒कु॒नि ब्र॑ह्म॒ नाम ॥

येन॑ सूर्य॒-स्त॑प॒ति ते॒ज॒से-द्धः॑ । पि॒ता पु॒त्रेण॑ पि॒तृमा॑न् यो॒नियो॑नौ ।

ना॒वे॒दवि॒न्मनु॑ते तं बृ॒हन्तं॑ । स॒र्वानु॑भु॒मा॒त्मान् संप॑रा॒ये ॥

ए॒ष नि॒त्यो म॑हि॒मा ब्रा॑ह्म॒णस्य॑ ।

न क॑र्म॒णा व॑र्द्ध॒ते नो॑ क॒नी॒यान् । 129

T.B.3.12.9.8

तस्यै॑वात्मा॒ पद॑वित्तं॒ वि॑दित्वा । न कर्म॑णा लिप्यते॒ पाप॑केन ॥
पञ्च॑पञ्चा॒शत॑-स्त्रि॒वृ॒तः॑ सम्॒व॒त्स॒राः॑ ।
पञ्च॑पञ्चा॒शतः॑ पञ्च॒द॒शाः॑ । पञ्च॑पञ्चा॒शतः॑ सप्त॒द॒शाः॑ ।
पञ्च॑पञ्चा॒शत॑ एक॒वि॒ं॒शाः॑ । वि॒श्व॒सृ॒जा॒ं॒ सह॑स्र॒ सम्॒व॒त्स॒रं॑ ॥
ए॒तेन॒ वै वि॒श्व॒सृ॒ज इ॒दं वि॒श्व॑-मसृजन्त ।
यद् वि॒श्व॑-मसृजन्त । तस्मा॑द् वि॒श्व॒सृ॒जः॑ () ॥
वि॒श्व॑-मे॒ना-न॒नु प्र॑जायते । ब्र॒ह्म॒णः॒ सायु॑ज्यं स॒लो॒क॒तां॑ य॒न्ति॑ ।
ए॒तासा॑मे॒व दे॒वता॑नां॒ सायु॑ज्यं । सा॒र्षि॒ता॒ं॒ समा॑न॒ लो॒क॒तां॑ य॒न्ति॑ ।
य ए॒त-दु॑पयन्ति । ये चै॒नत् प्रा॑हुः । येभ्य॑-श्चै॒नत् प्रा॑हुः ॥

ओं ॥ 130

(श॒श्व - दा॒स॒त - सि॒षा॒स॒ता - मा॒स॒त - ह॒विष् - प॒तिः -
क॒नी॒या॒न् - तस्मा॑द् वि॒श्व॒सृ॒जो ऽष्टौ॑ च)
॥ हरिः॑ ओं ॥

-----अभिश्चवणमन्त्र पाठ स्समाप्तः-----

“Korvai” (Chain) indicating starting “padam” of all the “Chapters” in Abisravanam.

स॒हस्र॑शी॒र्षा- म॒द्भ्यः॑-स॒हस्र॑शी॒र्षा- मृ॒तं-कृ॑णु॒ष्व-र॑क्षो॒हणः॑-
सो॒मा॒यो-श॑न्त॒स्त्वा-भ॑क्षेहि॒-ध्रु॑वा - ऽस्य॑ग्न उद॒धे-शि॒रो-
ऽसा॑वा॒दित्य॑- संत॑ति-र॒क॒वि॒श- इन्द्रो॑-वैश्व॑दे॒वेना॑- ऽग्नय॑-
उ॒श॑न्त॒स्त्वा-य॑-मु॒शन् ह॑-त॒ ह॑ - यां प्र॑थ॒मा-मृ॒चां प्रा॑ची चतु॑
र्वि॒शतिः॑ ॥

Begining and ending “padam” of Abisravanam.

स॒हस्र॑शी॒र्षा पु॒रुष॑ - ओं ॥

=====